

# MWENA BULOKÒ



...cyakabidi mwaba ewu, mu Dîna dya Mukalenge Yesu, ne bwa kuteeleja byenzedi binene ne bya bukole byûkaadi Wêwè mwenze, kumpala. Nenku mpindyewu tudi biimane ne myoyi kuulukuulu, aci cidi cibandisha ditabuuja dyetu ne citulaaba, bwa kwitabuuja ne bidi bilombiibwe diloolo edi nebifidiibwe. Wêwè udi mumanye kantu ne kantu kaa kudibi, byônsò bidibo balombe. Nenku tudi tubalombela, nangananga, Mukalenge, aba badi pabwîpi menemene ne lufu. Fila ditalala mu misuuka yabo piikaladi kadiyi dyanji kwikalamu. Fila dyondopa ku mibidi yabo. Enza nanku, Mukalenge.

<sup>2</sup> Benesha didisangisha dyetu. Tudi tulomba, Mukalenge, mu disangisha dya milombo dya mu diisâtù diloolo edi, ne, bu mutudi badisangishe, bamanye ne mwaba wônsò udi babidi anyi bapite apu badisangishe, Wêwè newikale neetu. Nenku tudi tuKulomba, Mukalenge, bwa utupe Dîyi Dyebe diloolo edi. Akula neetu, Mukalenge, ne fila luuya mu myoyi yetu, mu mushindu wa pabwawu, bwa tumanye mwa kudikazamuna twêtù biine bwa cikondo cinene cicipi kumpala, bu mutudi twitabuuja ne tudi baseemene pabwîpi ne Dilwa dya Mukalenge.

<sup>3</sup> Tudi tuKusakidila mpindyewu bwa bantu bakaadi babange kusangana ne diitabuuja didi ne mushinga kudibo, ne biikale bamanya cidi diitabuuja dyumvwija. Ne biikale bamanye, ne baKusakidila mene bwa masangisha acidi kumpala, biikale biitabuuja ne Wêwè newenzè cintu kampanda. Mukalenge, tudi bindile ne myoyi kuulukuulu, bu mu matuku a kale, twitabuuja ne cikondo cikaadi pabwîpi ciwikala mwa Wêwè kubandisha madidiishi a mu Dyulu ne kupongolola milayi idi Nzambi mulaye mu dituku edi dya ndekeelu.

<sup>4</sup> Mpindyewu tudi tuKulomba, Mukalenge, bwa—bwa wikale ne bônsò, mu matunga ônsò, bu mutûmvù leelu ewu bààbûngì baa mu nyungulukilu, myaba yônsò, biikale ne majinga. Ubape malomba abo, Mukalenge. Ne tudi tulomba bwa kumona cyanza cinene cya Nzambi ciikale cyenza mudimu pa buloba bujima munkaci mwa aba badi bindile cintu cinene eci.

<sup>5</sup> Utufwe luse ku mpekaatu wetu. Utunyooke, Mukalenge, ne Nyuma Webe ne Dîyi Dyebe, bwa twamona mwa kudikazamuna twêtù biine, basadidi baa butumike, basadidi baa butumike mu diswa dya Nzambi. Swaku bwa twavuluka, ne twaditacisha bwa kwela meeji mu myoyi yetu, byakenzabo kudi beena Kilisto baa ku cibangidilu. Mbantu baa mushindu kaayi batudi bafwanyine kutuutakeena naabo bu twêtù mwa kutuutakeena ne aba baakadi bôbô biine bapetangane Neebe. Mushindu mwine uvwa mpala yabo ne cya kwikala mikenkesha ne diitabuuja

ne disanka's we. Mushindu mwine uvwa nsòmbelu yabo ne cya kwikala Dìyì dya Nzambi didi ne mwoyi, biikale anu “mikanda mifundilangana ya babala kudi bantu bònso,” pavwabo babwela ne basanganyibwa munkaci mwa bantu. Nzambi, enzaku cyòci aci musangu ewu kabidi.

<sup>6</sup> Swaku bwa nsòmbelu yetu itambe kwikala miKukookele, mu mushindu wa Nyuma Mwímpè mwikale Yèyè mwine ne mwoyi kutudi, ne wakwila kutudi, Mukalenge. Swaku bwa twavuluka, mu meeji etu ne, patudi twendela mu mùsèèsù biikale tukuuyakana maboko ne baa pa buloba, katwena ne cya kufwanangana ne bóbò abu to. Kadi twikale tuseesuka tuya ku luseke bwa kubashiila bóbò kaaba, Mukalenge, mu mwaba udi mubakumbanyine bóbò panu pa buloba. Netwikale twètù tukasòmba mu nkwaswa wa paanyima, biikale bamanye ne tudi baaminyampala baa ku buloba bukwbabo. Twètù tudi ne Bukalenge bwikala mwa kwangata bukookeshi, Mukalenge. Ne wetu Mfumu munene neafike kataataka ne neakwate makalenge ónsò adi mu bukookeshi Bwende. Nenu Yèyè nealombole ne neakookeshe; netwikale Nende pa buloba apa, munda mwa bidimu cinunu, ne netwikale Nende kashidi.

<sup>7</sup> Biikale ne cyòci eci mu meeji, Mukalenge, mpindyewu tudi bindile dyandamuna ku disambila dyetu. Tudi twelangana meeji pa ditonda dyetu. Patwikala benze nî ncintu kaayi cyònsò, bambe nî ncintu kaayi cyònsò, anyi beele nî mmeeji kaayi ónsò, ciikale cibengangana ne diswa Dyebe dinene, swaku bwa Mashi a Yesu Kilisto atukezule.

<sup>8</sup> Tulomboleku, Mukalenge, mwám̀b̀i mwaneetu wa bakaji diloolo edi, pa bidi bitangila yèyè ne bayende mu njila wa kuya ku Chicago. Ubalombole, Mukalenge Nzambi, ku mwaba ùdì Wèwè mwa kukwata naabo mudimu, bwa kwikalabo bimunyi bya bukènkè kudi bakwabo badi babaabata mu m̀dim̀a, badi kabayi bamanye Mukalenge wetu Yesu to. Mpindyewu nyewu tuKulambula disangisha edi, ne diteeleja dya Dìyì Dyebe dya dilongolola, bwa twètù kumanya mwa kudilongolola bwa d̀b̀a dinene edi, mu D̀ǹa dya Yesu mmutudi tulomba nunku. Amen.

[Katupa kaa mukaba wa m̀ỳỳi munda mutupu. Mwaneetu Neville udi uumvwija—Muf.]

Mukalenge akubeneshe. Twasakidila, mwaneetu.

<sup>9</sup> Mvwa ndambu nciyi mutekemene cyòci eci to. M̀m̀m̀è, bu m̀nd̀i apa kwanyi kumbelu, mvwa mudyũmvwè anu bu ne byòb̀i bushuwa kabiyi bikengela m̀m̀m̀è kuya mwaba kampanda, mu bwalu bwa lukasalukasa, mvwa mufwanyine kudyumvwa bibi be, bu m̀m̀m̀è mwa kwikala mushaale musòmbè kumbelu nciyi ndwa mu disangisha dya milombo to. Kadi mu mushindu kampanda ndi mubwele cintũluntũlu, mu mushindu uvwa kawuyi mwindila to, bwanyi m̀m̀m̀è mwine, nansha bwa famiye wanyi. Ndi mubwele paanyi anu nanku, kadi kubundula anu

bwalu. Ke pa nanku mêmè kwamba ne: “Nêmpwekè nye mu disangisha dya milombo.” Nanku mukajaanyi kavwa nansha ne dîbà dya kudilongolola bwa kulwa to, nanku kavwa mumanye ne mvwa ndwa to.

<sup>10</sup> Pa nanku ndi ne disanka dya kuumvwa bujaadiki bwa mwaneetu wa bakaji wawa, mwaneetu wa balume, pa bidi bitangila Bukênkè buvwa mu Caroline du Sud anyi Caroline du Nord mwamwa, mwaba kampanda. Greenville, mmwômò amu anyi? [Mwaneetu wa bakaji mukwabo udi wamba ne: “To. Southern Pines.”—Muf.] Southern Pines. Eyo.

<sup>11</sup> Mwaneetu Lee Vayle uvwa mwab’ewu leelu ewu. Ndi mumubatiize, leelu ewu, mu mudimu wa dibatiiza wa leelu ewu mwab’ewu. Mwaneetu Lee Vayle unudi bamanye awu, ne bambi baba naka, Mwaneetu Parker Thomas. Kuvwa . . .

<sup>12</sup> Ndi mvuluka cikondo kampanda, mwaneetu wa bakaji kampanda mwikale mubwikila kudi mundidimbi. Civwa ncishindiki cinene, mwaneetu wa bakaji, cya . . . Nyuma Mwîmpè utu mîngà misangu utulekela tuya kumpala bwa kuteeta diitabuuja dyetu, bwa kumona ne bwalu budi cinyi, ne uteeta diitabuuja dya bakwabo. Paudi utangila buludi cintu kampanda, ne umona cintu kampanda, ne ucyamba; bakwabo batangila kabayi bacimona to, badi bamba ne kacyenapu to. Nwamonu anyi? Kadi’s cidipu.

<sup>13</sup> Mpindyewu, kakuvwaku muntu uvwa mwa kumona Bukênkè buvwa bulemebelele kumutu kwa Pòlò abu to, kadi’s Buvwaku. Muntu nansha umwe kaakamona nyuunyi wa nkuci wâkatùùluka ufuma mu Dyulu awu to, mu Bukênkè abu, mu mmwenekelu kampanda, kulemebelelaye kumutu kwa Yesu, pa kuumusha anu Yone nkaayende. Kadi’s uvwaku. Nwamonu anyi?

<sup>14</sup> Nanku, pashiishe, paanyima pâmvwà ndondela bantu bwalu bwa Bukênkè ebu buvwa bufwanangane ne Dikunji dya Kapya, muntu nansha umwe kavwa muswe kuciitabuuja to. Kadi mpindyewu dîsù dya cyamu cya fôtò dyajaadiki Cyôci aci, mushindu wakafikaCi.

Kadi nyuma mubi yêyè utu mufiike.

<sup>15</sup> Mbyenze menemene anu mudi nsòmbelu yetu, twêtù tudi mindidimbi. Ne tudi . . . Twêtù biikale bukênkè kampanda, piikala nsòmbelu yetu ikumbanangana ne Bukênkè bwa dituku, tudi twendela mu Bukênkè.

<sup>16</sup> Mbyenze menemene anu mùdi utangila pambelu wamba ne: “Ndi mmona dîbà,” mundaamuunya. Udi—udi umona mundidimbi wa dîbà. Ndidileeja dya dîbà mu cimfwanyi. Kî ndîbà, dyôdi diine to, kadi cidi cijaadika ne dîbà didiku. Cidi cijaadika ne dîbà didiku.

17 Nunku mpindyewu pândi mmona apa, bu munudi basòmbe mwaba awu, nudyela kapeepa ne makapakapa, nuyiikilangana, aci cidi cileeja ne nudi ne mwoyi, kadi cidi anu mundidimbi wa mwoyi.

18 Bwalu, cintu cyònsò eci cidi ne cya kwikala ne mwîdimà munda mwaci, bwa kwenzaci mundidimbi. Nwamonu anyi? Bwalu, bikengela mundidimbi wikale ne mwîdimà bûngì kampanda ne bukênkè bûngì kampanda, bwa kwenzaci mundidimbi. Nunku kacyna mwa kwikala anu cyònsò mîdimà, ne kacyna mwa kwikala anu cyònsò bukênkè to. Piikalaci mîdimà, mmîdimà anu ya menemene eyi. Piikalaci bukênkè, kakwena mundidimbi to, kakwena cintu cidi mwa kwenza mundidimbi to. Kadi padibi bisambakane mîdimà ne bukênkè, bidi byenza mundidimbi.

19 Pa nanku twètù tudi bulelela mindidimbi ya bukênkè. Mpindyewu wèwè udi uleeja mu cimfwanyi mwoyi mufumine mu mwaba kampanda. Pawikala, mwena Kilisto, eci ciikale mundidimbi, cidi anu cijaadika ne kudi Mwoyi kampanda mùdì kuyi mwa kufwa to, bwalu ewu mwoyi udi ne lufu munda mwawu. Nwamonu anyi? Kadi mmundidimbi, bwalu wèwè udi ne mwoyi, cifukiibwa cidi cinyungà ciikale ne dikumbanyina dya kumona, kwela meeji, kutentemuka, ne kuyiikila, ne byumvwilu bitaanu bya mubidi. Kadi nansha nanku udi mumanye ne, byòbì abi, bifwafwa. Nunku kudi lutatu lukole. Nudi bamanye, cidi mwa kwikala anu . . . Ndidileeja dya mu cimfwanyi, nwamonu's, dya ne kudi mwoyi ne lufu bisambakane.

20 Cya mubidi cidi ne cya kufwa. Kadi pawikala uleeja mu cimfwanyi, ku mwoyi webe wa cifwaka awu, Bukênkè bwa mu Dyulu, pa dîbà adi udi uleeja mu cimfwanyi Mwoyi wa Cyendelele, Nzambi. Nunku paudi ufwa, kwèna ne kukwabo kûyaayà to anu ku bwine Bukênkè abu, bwalu Bwòbò abu ke bùdì muleeja mu cimfwanyi.

21 Piikalabi ne wèwè udi wa mu buloba bwa mîdimà, ke cyûdì uleeja mu cimfwanyi, nenku udi mwa kwenza, kwèna uya mûngà njila to anu ku mîdimà. Nwamonu anyi? Pa nanku twètù tudi mu dileejiibwa dya mu cimfwanyi. Nunku, tudi tumona aci. Nunku anu mudibi bushuwa ne Nyuma Mwîmpè udi uleeja mu cimfwanyi Bukênkè ne Mwoyi, ke mudibi ne lufu ludi luleeja mîdimà mu cimfwanyi.

22 Nunku byònsò bibidi mbyòbì ebi. Maalab- . . . Pamba lumingu kujika, pâmwâpa patwamba kufika mu dyalumingu, netudyundishishe kaafòtò kakese aku kalwe wa munene, bwa baamona mwa kumuteeka ku mboodì wa mamanyisha.

23 Kwòkò aku, fòtò *wenu* mmukudika pambelu pààpa ku mboodì wa mamanyisha awu. Ncyèna mumanye ne nuwva bamumone, anyi to. Nunku pashiishe . . .

Nenku kukaadi bu lumingu lujima, mu—mu Jamaïque, mûmvwà muye mu mudimu wa bwambi. Tutu tutuma mikaba ya mêyì pa buloba bujima. Nenku *Bitampì Mwandamutekètè* mbikabwele too ne mwamwa mu...mwamwa munkaci menemene mwa Jamaïque, lwa munda mwa ditunga. Ne muntwamu bantu bacidi anu bashaadile menemene, paanyima paa Blue Mountain pààpa. Ne bantu baa mwine amu, misangu mikwabo, badi ne—cisanji cidi cikwata mêyì pa mikaba citudi tubapetela, kadi cikengela bwa—bwa nwènù, bu mudi Victrola wa kale ewu, kucyela manuvele, ne pashiishe kucilekela—kucilekela cimba mushindu awu. Pashiishe, paanyima paa ndambu yònsò wa tusunsa, bikengela muntu ucyela manuvele.

<sup>24</sup> Kasumbu aka kavwa ne—ne batterie mukese, batterie wa volts isambombo, anyi cintu bu nanku, wimbisha cisanji aci. Nenku bavwa—bavwa basòmbe bònsò kaaba kamwe, biipacila bûngì butudi mwab'ewu diloolo edi ebu, biikale bateeleja *Bitampì* abi, ngela meeji bivwa mbyôbì. Nenku pâmrvwà ngakula apu, kumonabo, mu cibambalu amu, Dikunji dya Kapya dimwedimwe edi dibwela, kuyadi too ne pavwa cisanji cisanganyibwa apu e kusòmbadi lwa kumutu kwaci aku. Ke kuya kakebabo cyamu cya fòtò ne kuDikwatabo fòtò. Anu Dyòdi dimwedimwe adi, ke Dyòdi adi, dilembelele anu mwaba awu kumutu kwa cisanji aci aku. Mpindyewu tudi baswe bwa kumudyundishisha, bwa twamona mwa kumulamika ku—ku mboodi wa mamanyisha kwaka, bwa nupete mushindu wa kumumona.

<sup>25</sup> Tudi ne kusakidila kwàbûngì bwa ngàsà wa Nzambi udi mutwadiibwe mu beetu. . . mutubweje mu Bwikadi Bwende mu dituku edi. Mpindyewu tudi ne kusakidila bwa bintu byàbûngì.

<sup>26</sup> Mpindyewu ndi ngela meeji ne nêntapè disù muntwemu bwa kumona ne ndi mwa kusanganamu ndambu, ndambu wa tubeji tûndi mufundile maalu anyi ndambu, cintu cikwabo cîndi mwakulepu. Anyi, kutupetelaku cikampanda cya mushindu wa—wa. . . Ndi ne mifundu kampanda yîndi mufunde, nansha nanku, paanyima apa mu mukanda kampanda. Mêmè mwa kupetaku nansha umwepele, pâmwăpa Mukalenge neampeeshe cintu kampanda cya kwamba pa cintu kampanda, patudi tusambila apa.

Mpindyewu tudi ne myoyi kuulukuulu bwa dyalumingu.

<sup>27</sup> Mu Mayiisha ke mûndi ngakwila. Nenku, mu dyalumingu, ndi munulame mukûngùlù mule mwab'ewu, pa: “Bwa cinyi udi wela mbila Kûndi? Akula wambile bantu nuye kumpala.”

<sup>28</sup> Mpindyewu, mu dyalumingu nekwikale disangisha dya dyondopa mutwikala mwa kusambidila babeedi. Mpindyewu, udi useemena pabwîpî ne babeedi, nenku kudi ne cya kwikala kabingila kampanda kadi kenza ne babeedi, patudi tubasambidila, kabayi mwa kwondopiibwa. Nenku ndi muswe,

bu Mukalenge mwa kwanyisha, kuyiisha anu kaadiyiisha kîpî cyanaana mu dyalumingu kabidi, mu dinda. Pa nanku, nêngenzè disangisha dya dyondopa, bwa kusambidila bantu bônso. Nenku Billy Paul anyi umwe wabo neikale mwab'ewu mu dyalumingu mu dinda, lwa pa dîbà mwandamukulu, padi ekeleeziya ukanguka, bwa kupa bantu twarta padibo benda babwela ku ciibi apu, anyi dîbà dyônsò dyabwelabo adi.

<sup>29</sup> Nenku mpindyewu, pa dîbà adi, ndi muswe kuteeta, ndi ngitabuuja ne nansha nanku Mukalenge mmumpeeshe kaacyumvwilu kakese pa bidi bitangila tubingila tudi twenza ne bamwe bantu kabayi bondopiibwa. Nenku ndi—ndi ngela meeji ne ndipanga dya dyumvwa. Nenku ndi—ndi ngela meeji ne, pâmwâpa, netwakule pa ciine aci, mu dyalumingu mu dinda, bu Mukalenge mwa kwanyisha.

<sup>30</sup> Mpindyewu, disangisha dya milombo dya mu diisâtù diloolo didi anu disangisha dya citupa cîpî mutudi tudisangisha ne tusambila, mututu twenzenza amu, tuswikakanangana pamwe.

<sup>31</sup> Misangu mikwabo, ndi—ndi ngela meeji ne cimwe cya ku bintu binene cîndî nsangana mu dituku edi, ndipanga dya meeji matooke pa bitudi twitabuuja. Nwamonu anyi? Nwamonu anyi? Bu Nzambi, mu matuku a John Wesley, wikala mwenze mu dituku adi bidiYe mwenze leelu ewu ebi, bivwa mwa kwikala byenze cinyi; mu matuku a Martin Luther, anyi bakwabo? Bu bitudi tuMumona wenza ebi, bijaadikiilbwe ne kudi Ekeleeziya, kudi Nyuma; ne kudi maalu a mamanya, ne kudi nkwaka yônsò, bikengela cî—cînsangânsàngâ cyaci cijingulule. Ne Diyî dya Nzambi mwab'ewu dileeja Cyôci aci ne diCyamba kumpala kwa Cyôci kwenzeka. Ne pashiishe citentemuka, ne cyamba ciprofeta, ne cileeja cintu ciine cyakambaYe. Cidi cilwa kwenzeka anu menemene, anu civwaYe mwambe pyòpyopyò. Kadi twêtù basômbe anu byenze bu beena lulèngù nanku awu, bu badi badyela nkonko. “Ee, ndi ndikonka ne aci cidî mwa kwikala cingamba mêmè anyi? Ndi ndikonka ne cidî mwa kwikala cyamba anu—anu ekeleeziya, mu kaabujima. Anyi—anyi, ndi ndikonka ne ncyâ bushuwa ndi paanyi mubadiibwe mu Cyôci eci anyi?” Ngela meeji ne, mu dyalumingu mu dinda, nêntetè kwakula pa amwe a ku mêyi makulu awu adi mafwanyine kutukenkeshilaku ndambu.

<sup>32</sup> Mpindyewu, diloolo edi, ndi musangane cintu kampanda, ndi mfuma ku dibuululapu mwab'ewu, kumpala kwa mêmè kupweka. Mvwa ndyambidila ne: “Ambabi tûng bu Mwaneetu Neville, bu mêmè mwa kupweka kuntwaku, kwenzekabi ne àmbè ne: ‘Juuka uyiishe,’ kadi yèyè kushaala kacya anu wàsômba”? Nwamonu anyi? Mêmè kudyambidila ne: “Mbîmpè mfunde ndambu wa Mifundu.” Bwalu, ndi mumanye ne, yèyè awu, mmwaneetu wa dinanga dyàbûngî, ne tutu—tutu tumwanyisha.

<sup>33</sup> Kumpala kwa twêtù kusambila bwa Dîyì, ndi muswe bwa twêtù kwanji kusakidila mwa—mwaneetu kampanda. Ncyèna nansha mwa kuvuluka dînà dyende bwa mutanci ewu to, badi babidi. Badi mwab'ewu, mbalunda baanyi. Ba . . . Mbambi ne batangadiki, mu budimi bwa bwambi, batu bapatuka. Batu bumvwe Mayiisha aa pa mikaba ya mèyi. Ne mbafumine mu ekeleeziya mishiilangane ya cyena mangumba, nsongaalume ya citende ibidi. Nenu nsongaalume ewu udi, umwe wa kudibo's, mbimusankishe bikole, mu mushindu wa ne mmwangate ndeke mulwe, ku Tucson, matuku abidi aa, kundekeelu kwa disangisha. Ngela meeji ne mvwa nsanganyiibwa mu Didya dya dinda dya Beena Kantu-ku-byanza. Ke nsongaalume wa citende ewu, nsongaalume wa maalu mîmpè ewu, kupwekaye kûmvwà aku. Kabidi udi . . .

<sup>34</sup> Mbaa ku Kansas. Kadi mbalwe mwaba ewu benze lwendu lwônsò alu bwa mêmè ndwe kuswika mabaka abo. Mêmè ndi nganyisha cyôci aci. Pa kwela meeji ne bantu badi biitabuuja ebe, mushindu mukumbane, biitabuuja ne Nzambi mmufwanyine kuumvwa ne kwandamuna; nsongaalume micîkàle ibangilaku maalu a panu, mushindu ewu. Nenu padibo bafike mwaba ewu bwa mêmè kuswika mabaka abo, makeelela awu, kadi kulwabo kujandula ne mukenji wa ditunga dya Indiana udi ulomba ne, nansha mukaadibo bamane kwenzeja mateeta abo a mashi amu, badi ne cya kwindila muneemu mu ditunga edi, matuku asatu, kumpala kwa kumonabo mwa kubaswika mu dibaka. Pa nanku, mabaka abo adi mwa kuswikiibwa anu ku ditânù mu dinda.

<sup>35</sup> Nenu nêndombè mwaneetu udi lwa kundekeelu kwaka wawa, ne udiku mwa kujuukila kuulu ne kutwambila dînà dyende, ne mukajende mutekete mwîmpè kumona wawa, ne mwaneetu wa balume udi ulonda wawa.

<sup>36</sup> [Mwaneetu awu udi wamba ne: "Twasakidila, Mwaneetu Branham. Ndi ne dyèsè dya kwikala mwab'ewu. Nenu mêmè ndi Mwaneenu Roger O'Neil, ntu musòmbèle mu Kansas, ntu ngenza ngendu mu budimi bwa bwambi, bu mutangadiki, ngambilangana ne: 'Yesu udi usungila, wondopa, ku diitabuuja mu Yesu . . . ? . . . ' Ntu ngenda anu ne . . . ? . . . Ewu mmubangila wanyi, Patricia Brown. Tudi tujinga kubwela mu dibaka, mu ditânù. Ewu mmutangadiki naanyi ne mukwaci wa mudimu pamwe naanyi, Mwaneetu Ronnie Hunt, kundekeelu eku. Ne ewu ke wende mubangila, Carol . . . ? . . . Nenu tudi ne disanka dya kwikala mwaba ewu diloolo edi."—Muf.]

<sup>37</sup> Twasakidilaayi, wa manza tente. Ncya bushuwa ne tudi tujingila milòpò ya twânàtwânà eyi, bwa mudimu wa Mukalenge Yesu, mabenesha a Nzambi, bwa kubendesha lukasa mu njila. Nenu mêmè bu mûndi ndikonka, mwindile Dilwa dya Mukalenge, ne mmona nsongaalume ne nsongaakaji ya bitende miikale ne kiipacila mu mwoyi, bwa kusadila Kilisto, aci's

cidi cintupisha ne disanka, nwamonu's, pa kubamona bajuuka mushindu ewu. Mukalenge anubeneshe, ne mabanji ònsò, mwaneetu wa balume, mwaneetu wa bakaji.

<sup>38</sup> Mpindyewu tubuululaayi mu Kakanda kakese kântù nciyiku mwanji kwakulapu kacya kwònsò eku, kacya bandela. Nenku kadi . . . Anu nshapita umwepele cyanaana, Mukanda wa Filemona. Nenku udi . . .

<sup>39</sup> Mémè ntu ndambu Irlandais, nenku ndi—ndi ne kakanu kajingile ménù aanyi a kwinshi, bwa kwikalaku kalame abidi a kundekeelu pa kaaba kaawu. Mémè, mémè, misangu mikwabo nciitu nshindumuna ménà aa mu ôwò to, pândi mumanye cya bushuwa cidiwu. Nenku misangu mikwabo nciitu mwa kuashindumuna mu ôwò to, bwa dipanga kulonga dya kalaasa. Pa nanku, “Filemona,” mwámò muntu kampanda lwa paanyima pààpa, cîndi ngela meeji ne ke dishindumuna dya cya bushuwa dya dînà adi.

<sup>40</sup> Mpindyewu, mvensa wa kumpala, ndi njinga kwangatamu mwaku umwe anyi ibidi cyanaana.

*Pòlò, mwena buloko wa Yesu Kilisto, . . .*

<sup>41</sup> Nenku ke cîndi njinga kukwata naaci mudimu diloolo edi, bu cyena bwalu, Mukalenge mwanyishe, ne: *Mwena Bùlokò*.

<sup>42</sup> Mpindyewu, nudi bafwanyine kudifwanyikijila ne lutatu Pòlò mwikale udyangata bu mwena buloko. Muntu mulela mudishikamine, mùle tente ne Nyuma Mwîmpè, kadi nansha nanku mwikale udibiikila “mwena buloko.”

<sup>43</sup> Nenku mpindyewu tudi tujandula, padiye wambila beena Kolintò ne: “Pòlò, mupostolo wa Yesu Kilisto.” Musangu mukwabo ne: “Pòlò, musadidi wa Yesu Kilisto ku diswa dya Nzambi,” padiye wambila Timote, ne bakwabo bashiileshiilangane. Mpindyewu padiye ufundila Filemona mwaba ewu, mmwambe ne: “Pòlò, mwena buloko wa Yesu Kilisto.” “Pòlò, mupostolo,” ndi njinga kuyiisha diloolo kampanda pa cyôci aci. “Pòlò, mu—musadidi,” kuyiisha pa cyôci aci. Ne pashiishe ne: “Pòlò, mwena buloko.”

<sup>44</sup> Kadi, diloolo edi, bu mudibi ne mbifwanyine kwangata mêtà bwa kwangata cimwepele cya ku byena bwalu abi mu mushindu mujaalame, ndi njinga kwangata, diloolo edi: “Pòlò, mwena buloko,” ne kwangata cyena bwalu ne: *Mwena Bùlokò*.

Mpindyewu twinyikaayi mitu yetu bwa katanci kakese.

<sup>45</sup> Mukalenge Yesu, muntu kana yònsò ewu, udi ne mubidi tumatuma ewu, udi mwa kubuulula mabeji a Bible ewu, kadi anu Nyuma Mwîmpè ke udi mwa kuMuumvwija mu bukênkè budibi bilongolwela. Tudi tuMulomba Yèyè alwe mpindyewu bwa kutukwacisha bwa kuumvwa ne ciine eci civwa ncinyi, cyakamba, muprofeta munene, wa bukole ewu, Pòlò, kadi mwikale udibiikila “mwena buloko.” Swaku bwa Nyuma



Mwîmpè atubuulwile cyôci eci patudi baMwindile apa, mu Dîna dya Yesu Kilisto. Amen.

<sup>46</sup> Mpindyewu ndi mwa kudifwanyikijila, Pôlò, paakafundilaye Filemona mwine mukanda ewu, mushindu uvwaye musòmbe mu buloko, mwamwa naka mu kàshò kaa cimenga eci, mwena buloko. Ne yêyè uvwa mwa kumanya bilondeshile kaaba kavwaye ne, mwaku awu uvwa uumvwija cinyi. Uvwa munyungulukila kudi—kudi—kudi milonda ya byamu. Bavwa—bavwa anu bafwanyine kumulekela mudishikamine anu pavwa muntu kampanda mufwanyine kumulekela kuyaye mudishikamine. Ne yêyè uvwa mumanye ne kwikala mwena buloko ncinyi. Ne pashiishe, kabidi, ndi ngela meeji ne mupostolo ewu uvwa uswa kwamba anu kakese cyanaana. . . kayi ucyamba menemene bwa ngiikadilu wende uvwaye usanganyibwa diine dîbà adi awu to, bu mwena buloko wa diikala dyende dya musòmbe mu mubidi ewu mwaba ewu mu buloko ebu to. Kadi ndi ngela meeji ne yêyè uvwa mutangile ku diikala dyende, ku nyuma wende—wende—wende, diswa dyende, mwikale mwena buloko wa Yesu Kilisto.

<sup>47</sup> Mpindyewu, twêtù bônso aba tudi balediibwe, biikale ne budishikaminyi bwa kusungula, bwa kwangata dipangadika dyônso ditudi baswe kwangata adi. Nzambi ngudi wenza aci ne bujaalame bwônso. Bwalu, bikengela Yêyè ateeke muntu ne muntu pa bishimikidi bya mwomumwe, cyanaana Yêyè mmuteeke muntu udi kayi ukengediibwa pa. . . Yêyè wakateeka muntu wa kumpala pa bishimikidi bivwa kabiyi bikumbane to, bu mwakamuteekaYe mwikale ne budishikaminyi bwa kusungula. Nwamonu anyi? Mushindu awu ke utudi menemene, diloolo edi, bu Adama ne Eva. Kakwenaku dishiilangana to. Maalu mîmpè ne maalu mabi adi asanganyibwa kumpala kwa yônso wa kutudi. Mwoyi ne lufu, twêtù mbadi mwa kwenza disungula dyetu; bwalu budi kûdi, bwa kwenza nanku. Nwamonu anyi?

<sup>48</sup> Mushindu awu ke wakenza Adama ne Eva, ne, nwamonu's, nenku—nenku kwenzabo disungula dibi adi. Nenku mpindyewu, ku cyôci aci, kwelabo bukwabantu bwônso, bukwabantu bwônso nkòong, mwinshi mwa lufu, cibawu cya lufu.

<sup>49</sup> Ke pashiishe Nzambi kutuuluka panshi mu mmwenekelu wa muntu ne kwangata lufu alu, ne kufuta cibawu cya lufu, bwa ne. . . Bantu Bende bavwa bajinga kwikala badishikamine bavwa mwa kuya badishikamine.

<sup>50</sup> Mpindyewu, bu Yêyè mutwângate twêtù, kabiyi mu mushindu wakenzaYe ne Adama ne Eva awu to, mutukokele anu mu cintu kampanda cikwabo, wamba ne: “Nênkusungile nansha wêwè muswe kusungidiibwa anyi kuyi muswe,” apu's Yêyè wakateeka Adama ne Eva pa—pa bishimikidi bivwa kabiyi bikumbane to, nwamonu's. Kadi bikengela muntu ne muntu wa

kutudi asungule, mu dituku edi, pankaci paa lufu ne mwoyi. Tudi mwa kucyenza.

<sup>51</sup> Bu mûngǎfumu ku dicyamba, piikala bukênkè bwebe mwa kujaadika, nsòmbelu webe neajaadike anu menemene ne udi luseke kampana. Byûtù wenza, dituku dyònsò, bidi bijaadika cyûdi. Nukaadi bumvumvwe kasumwinu kaa kale kaa ne: “Nsòmbelu webe udi wakula ne dîyì dikole be, mu mushindu wa nciyi mwa kuumvwa bujaadiki bwebe to.” Nwamonu anyi? Byenzedi byebe bidi byakula ne dîyì dikole be.

<sup>52</sup> Mémè ntu misangu yònsò ngitabuuja dyela dya mbila ne ditupika. Kadi ntu anu ngambamba ne: “Kwikadi utupika uya muulu kupita nsòmbelu wûdi nende, bwalu baa pa buloba bôbò nebatangile aci.” Nudi numona anyi? Udi ne cya kutupika anu pa bule budi nsòmbelu webe, nenku, bwalu muntu kampanda udi munkaci mwa kukutangila. Nenku mpindyewu padi . . .

<sup>53</sup> Bantu kabaakulwa mu ekeleeziya to. Badi—badi, bààbûngì baa kudibo, kabaakulwaku to. Ne bamwe baabo, padibo kabayi balwa to, mbantu baa meeji matooke. Bakaadi bamonemone dinyanguka bûngì cyanaana mu ekeleeziya, mu mushindu wa kabaciyi kabidi bwalu bwa kuyamu to. Nenku misangu yàbûngì, tudi twakula anu pa meeji a ciipanshi a byôbì abi, udi mufwanyine kupanga ne paa kubadyudila, nwamonu’s, bwa mushindu udi—udi bantu benza maalù. Badibiikila mudibo beena Kilisto. Bôbò kadi ke cilendwishi cidi citambe bunene cikaadiku baa pa buloba bapete, mbalume ne bakaji badi badyamba mudibo beena Kilisto, kadi biikale ne nsòmbelu mushiilangane ne bidibo balaka mukana abi. Cya bushuwa menemene.

<sup>54</sup> Mpindyewu, bwalu diteketa dya mu maboko nediikaleku dyàbûngì ku Cilumbulwidi. Mpindyewu, ngènzàmpèkààtù yêyè, musumbishi wa mu musokoko wa maala a kapyà, munayi wa twarta twa mfranga, ngèndààmàsàndì, yêyè—yêyè awu kaakutekeshiibwa mu maboko to pa kuumvwa dikosa dya cilumbu cyende ne: “Nda mu kapyà kaa kashidi.” Yêyè awu kaakutekeshiibwa mu maboko nansha. Kadi mulumyana udi ukeba kusokomena paanyima paa mushindu kampanda wa dijikula dya mu ekeleeziya awu, ke mulumyana wàtekeshiibwa mu maboko mu Dituku dya Cilumbulwidi nyawu. Nwamonu anyi? Ewu udi udyamba mudiye mwena Kilisto, kadi mwikale ne nsòmbelu wa mushindu mukwabo. Mbipiciibwe ne kayiku mulake nanshà mwine mukana amu to, kayiku nanshà mubange to, pamutu paa kubanga kadi kwikala ne nsòmbelu mushiilangane. Bwalu, yêyè awu ke dibwe dya cilendwishi didi ditambe bunene ditudi bapete, mbwa mulaki wa mukana awu udi wamba mudiye—mudiye—mudiye mwena Kilisto, kadi mwikale ne nsòmbelu mushiilangane.

55 Misangu yònsò, kwikadi ucinkila nsòmbelu webe bilondeshile búngì bwa bukole bùdi naabu bwa kwenza kwa bishima to. Kabidi katwena tudicinkila twètù biine ku búngì bwa dimanya dya Diyì dyùdi naadi to. Kadi misangu yònsò ikala udicinkila, utangila paanyima ne ubalulula mushindu wa mamuma adi nsòmbelu mwine wùdi nende mpindyewu awu ukwama. Nwamonu anyi?

56 Bu mûmvwà muyiishe kukaadi cikondo kampanda, mu disangisha dya beena kantu-ku-byanza mu Phoenix, Arizona, pa kuleeja kwa Yesu mu cimfwanyi, kuleeja kwa Mwoyi wa bwena Kilisto mu cimfwanyi. Mémè kwamba ne batu bandelele mu Kentucky emu, mudi maalu macikàle mashaadile bikole, nangananga kale pàncìvwà mwànà. Nenku mwànà kampanda mukese wa balume ewu kavwaku kacya ne nzubu bu itudi naayi muneemu emu eyi to, mutukaadi ne nsongaakaji yàbúngì be milenga kwísù ìdi anu yôyì miditangile mu mmwenu, ne mu nzubu mujima, bwa kulama nsuki yabo kacya yàlala, ne bikwabo. Kadi yêyè awu uvwa ne kaalumwenu kakese kamwepele, kapese kakese kalamika mu mucu pambelu, mwaba uvwa cibasa cya disukwila bilàmbà cisanganyibwa, mwaba uvwa tatwëndè ne mamwëndè boowela màyi, basaamwinapu nsuki, ne bikwabo, baditangidila mu kiine kapese kaa lumwenu kakese kaa kale kavwa kalamika ku mucu aku.

57 Bwa kwamba menemene, ke nzubu wa mushindu awu utudi nende. Muntu yònsò uvwa muswe kumona lumwenu, twètù bânà, bivwa bikengela kwangata kasheete ne kubanda pa cibasa cya disukwila bilàmbà apu, bwa kuditangila mu kapese kaa—kaa lumwenu kâmvwà mwangule aku, mémè mwine, ku diyaala kampanda. Aci kacivwa mmwamwa mu Kentucky to. Aci mmuneemu mu Indiana, mu Utica Pike emu.

58 Mpindyewu, mwànà mukese ewu kavwaku mwanji kudimona yêyè mwine menemene mushindu awu to. Nenku, kulwaye mu cimenga, bwa kukumbula kakwëndè mukaji. Nenku ku... Mpavwaye wenda wendakana mu cibambalu amu, kaaku awu uvwa ne nzubu mwikale ne lumwenu lujima lulamika ku ciibi. Nenku, mwànà wa balume mukese ewu, wenda unyeemakana mu ci—cibambalu amu, kumonaye mwànà mukwabo wa balume mukese kumpala kwende. Ne mwine mwànà wa balume mukese ewu uvwa wenda unyeemakana, yêyè pende. Ke yêyè kudyambidila ne bikengela ànjì kwimana ndambu wa tusunsa bwa kumona civwa mwànà wa balume mukese awu mwa kwenza. Nenku paakiimanaye, mwànà wa balume mukese awu kwimanaye. Pavwaye utuma mutu ku luseke, mwànà wa balume mukese awu uvwa utuma mutu ku luseke. Udikoonya ku mutu, mwànà wa balume mukese awu udikoonya pende. Ndekeelu wa byònsò, kuseemenaye pabwìpì, bwa kudijaadikila. Ke kukenzakanaye. Mamwëndè

pende nkacya wamutangila, ne kakwëndè mukaji awu, bakema. Yèyè ne: “Mona’s, mààmù, s’mmèmè.”

59 Pa nanku mèmè kwamba, ne: “Twètù peetu, kabidi, tudi tuleeja cintu kampanda mu cimfwanyi.” Nwamonu anyi? Mwoyi wetu utu muleejiibwe mu cimfwanyi.

60 Nanku mpindyewu, bu twètù ne mwoyi mu cikondo cya Noa, tuvwa mwa kwikala bangate luseke kaayi? Tuvwa mwa kwikala bangate luseke kaayi mu dituku adi dinene divwa Noa ne mwoyi? Tuvwa mwa kwikala bangate luseke kaayi mu matuku a Mòsà? Luseke kaayi mu matuku a Eliya, muprofeta, pavwa buloba bujima butukine mu mushiki munene wa—wa nsömbelu wa cyena leelu, bu Izabela wa cyena leelu ewu, mwikale mubweje basadidi bônso baa Mukalenge mu njila wa maalu a pa buloba? Ne ekeleeziya ne baakwidi bônso bamwinamina yèyè. Uvwa mwa kwikala mwangate luseke lwa dimanyika, anyi uvwa mwa kwikala mwimane ne Eliya?

61 Mpindyewu, ne mu matuku a Mukalenge Yesu, mutudi bafwanyine kwela meeji bwa Muntu uvwa kayi mumanyike ewu, kayi mulongesha tulaasa kudi baa pa buloba, kakuyiku bilongelu bivwabo bafwanyine kwikala bapete ne nkwakayaYe to, kayiku ne—ne dilabula nansha dimwe dya ku seminere to. Ke—ke pashiishe kajuuka ne dîna dya “mwânà mulela mu masandi.” Kadi pashiishe kupatuka, wenda uyiisha Evanjeliyo mubengangane ne cyônso cikaavwabo bôbò balongeshiibwe. Mutambe. . . Mwine awu upiisha bambi ne malongolodi abo, ne bikwabo.

62 Nanku malongolodi avwa meele dîyi dya ne: “Muntu yônso wadidinga wâya kateeleja udibo bamba ne mmuprofeta ewu awu, neipaciibwe mu nsunàngòngà,” civwa ciikale mpekaatu wa—wa lufu. Bivwa bikengela bamushipe. Mushindu umwepele uvwabo mwa kukuukwila uvwa anu mwinshi mwa mashi a mwânà wa mukooko. Bivwa bikengela kulwabo ku mulambu ewu. Nanku—nanku pa dîbà adi bavwa bamwipata, kadi aci civwa ncintu bunene kaayipu’s we.

63 Kadi Muntu ewu kavwa muteyeku ntema ku biine bya nanku awu abi to. Kadi nansha nanku Yèyè uvwa anu mukumbanangane ne Mifundu menemene, kadi kabiyo mushindu uvwabo bôbò baYimanye to. Nduseke kaayi lûvwà wèwè ewu mwa kwikala mwangate? Nwamonu anyi? Mpindyewu, kwèna. . . Nsömbelu webe wùdi nende mpindyewu, udi mpindyewu anu uleeja mu cimfwanyi cyûvwà mwa kwikala mwenze ciine cikondo aci, bwalu uciidi mukwaciibwe anu kudi nyuma umweumwe awu. Wamonu anyi? Wèwè mwangate luseke alu mpindyewu, lwabo bôbò abu, cyôci aci ke cyûvwà mwa kwikala mwenze ciine cikondo aci. Bwalu, nyuma umweumwe udi munda mwebe mpindyewu awu ke uvwa munda mwa bantu baa ciine cikondo aci. Nwamonu anyi?

64 Dyabulu katuku wangata nyuma wende to; udi yêyè anu uumuka kudi muntu e kuya kudi mukwabo.

65 Nzambi katuku wangata Nyuma Wende to, nansha; Udi uumuka kudi muntu e kuya kudi mukwabo. Nwamonu anyi?

66 Pa nanku, Nyuma mwine uvwa pambidi paa Eliya awu ngwâkalwa pambidi paa Elisha, Yêyè umweumwe awu pambidi paa Yone Mubatiiji, anu nanku.

67 Nyuma Mwîmpè, uvwa pambidi paa Kilisto awu, wakalwa pambidi paa bayiidi, anu nanku anu nanku, ke uciidi pambidi paa bantu ewu. Nudi numona anyi? Nzambi katuku wangata Nyuma Wende to.

Nenku ke patudi bashaadile apu, bwa kwenza disungula.

68 Nenku ncyêna—ncyêna mwa kumona apa mwaba uvwa Pôlò unyingalala bwa cintu kampanda to, mwikale wamba muvwabi bimutonda muvwaye mwena buloko. Kadi uvwa yêyè mwine wambila. . . Ndi ngitabuuja ne Pôlò, pavwaye ufunda mukanda ewu ne kasala aku apu, Nyuma Mwîmpè nguvwa mumusake bwa kufundaye aci. Cyôci aci, pâmwâpa, nansha too ne diloolo edi, bwa twamona mwa kupatula dyumvwija dya cyena bwalu cyetu, bwa kuleeja ne mbwa cinyi Pôlò wakenza cyôci eci. Bwalu, ncyu mu Mifundu, ne cya mu Mifundu ncyu Cyendelele. Ndi ngitabuuja, ne, bu muvwaye musômbe mu buloko bwa midimà ne manyaanu ebu, Pôlò wakafundila nyaanende mwaba ewu, ne, mwanaabo ewu, ne uvwa “mwena buloko wa Yesu Kilisto.” Pa nanku, uvwa mwa kucyamba pa kumona bivwa bimunyungulukile. Mpindyewu, yêyè uvwa mu buloko, kadi kî ng’aci civwaye wambila, musadidi wa Kilisto ewu, mwambi nende ewu to. Uvwa wamba ne yêyè uvwa mwena buloko wa Dîyi dya Yesu Kilisto, bwalu Kilisto n’Dîyi.

69 Ne Pôlò uvwa mumanyi munene wa dibàla mu dituku dyende. Uvwa ne kiipacila kanene. Uvwa—uvwa muntu uvwa mulongeshiibwe, kudi bantu, kudi muntu dînà dyende Gamaliele, uvwa mulongeshi munene wa dituku dyende, mu cimwe cya ku bilongelu bitambe bunene kuvwaye mwa kwikala muye. Cileejilu, bu mututu twamba, Wheaton, anyi Bob Jones, anyi cilongelu kampanda cishindame. Uvwa mulongeshiibwe bu mwambi wa Dîyi. Ne yêyè uvwa mulongeshiibwe bikole, ne meeji matwe, mwikale kabidi nsongaalume wa lumvu mwikale ne kiipacila kaa ne pâmwâpa dîngà dituku neashaale mwakwidi anyi mwakwidi munene bwa cisamba cyende.

70 Uvwa ne kiipacila. Nenku pashiishe bwa kujandula, ne, kiine kiipacila kanene kavwabo bamulongeshile aka, kavwaye mupicishile matuku ende ônsò a mwoyi aku, pâmwâpa kubangila pacivwaye ne bidimu mwandamukulu anyi dikumi, too ne ku makumi bitwe ku asatu anyi makumi asatu ne bitaanu, paakajikijaye tulaasa tutumbuke ne kupetaye dipolome; ne wakapeta mapoloma ende ônsò ne bikwabo, ne mwikale mu

dipetangana òmpè ne ba—balombodi bònso baa ekeleeziya abu, too ne mwakwidi munene wa mu Yelusalema. Kupetaye mèyi mamutumina a kudiye, mèyi a kudiye yèyè mwine, mafunda, bu muvwaye weyemena mwine Shawula munene ewu ne: “Kupweka ku Damaseke ne kuya kapeta aba bònso bavwa bakuuwila Nzambi bibengangane ne muvwaye yèyè wamba abu, kubaswika kubeela mu buloko. Byôbi bikengediibwa, uvwa ne mèyi mamutumina bwa kubashipa, piikalaye yèyè muswe.” Uvwa . . . Uvwa ne kiipacila kanene.

<sup>71</sup> Kadi mpindyewu, byônso bivwabo bamulongeshile abi, Nzambi ukaavwa mumuumushebi byônso. Nwamonu anyi? Ne civwa ciikale kiipacila kende, ne civwa tatwëndè mutuudile mfranga aci, ne civwa twipacila twa tatwëndè ne mamwëndè aci, bikaavwa byumushiibwe byônso kudiye bwalu—bwalu Nzambi uvwa ne cintu cya cyanaana. Ke bwa cinyi, uvwa mwena buloko wa mukaavwaye muumuke ku kiipacila kende kavwaye naaku mu maalu a panu, mukashaale mwena buloko wa Yesu Kilisto, Yèyè uvwa Dìyi awu.

<sup>72</sup> Njila wa ku Damaseke awu kushintululaye Pòlò. Pavwaye wenda upweka, pa kwipacila díbà dikumi ne dimwe, pámwápa, mundaamuunya, kwedibwaye cibula. Ke kuumvwaye Dìyi, dyamba ne: “Shawula, udi uNkengesha bwa cinyi?” Ke yèyè kubanduluka. Mmwenze anu ubanduluka, bu muvwaye mwena Yuda, uvwa mumanye ne Dikunji dya Kapya adi divwa m’Mukalenge wâkalombola bânà baa Izaleela, bwalu wakamanya ne n’Dyôdi adi.

<sup>73</sup> Vulukaayi ne, mwena Ebelu ewu kavwaku mwa kwikala mubiikile nî ncinyi nî ncinyi “Mukalenge” to, ne dileeta dinene M-u-k-a-l-e-n-g-e, Elohim, anu yèyè mutwishiiibwe ne n’Dyôdi adi, bwalu uvwa mulongeshiiibwe mushaale mumanyi wa dibàla. Nenku mmwenge anu ubanduluka, ne umona Eci, Bukênkè, Dikunji dya Kapya dyakalombola cisamba cyende mu cipeela adi, ke kwambaye ne: “Mukalenge,” Elohim, ne dileeta dinene M-u-k-a-l-e-n-g-. . . “Mukalenge, Wèwè udi Nganyi?”

<sup>74</sup> Kadi ndipapuka kaayipu divwa mumanyinyi wa Nzambi mu tulaasa ewu mwa kwikala mupete, paakambaye ne: “Mèmè ndi Yesu,” Mwine uvwaye ulwisha bikole awu. Dikuvumuka kaayi—kaayipu’s we! Kaa! Kaa! S’civwa ne cya kwikala cintu cya cikiwacisha bwôwà bwa muntu ewu, bwa twipacila twende twônso tuvwaye naatu, bwa kujandula dyakamwe, ne, ukaavwa yèyè ukengeshangana. Twipacila twende tukaavwa tumutume kule menemene ne cintu cya mushinga civwaye mwelele meeji bwa kwenza. Kadi ncikuma bunene kaayi civwa ne cya kwikala cyenzeke, bwa mupostolo ewu, paakambaYe ne: “Mèmè ndi Yesu,” Mwine uvwaye ukengesha awu’s. “Udi uNkengesha bwa cinyi?”

75 Kaadiyì kakwabu kakese kamba katudi bafwanyine kwela mwab'ewu. Nudi numona's, padibo baseka Ekeleeziya, mu bushuwa bwa bwalu kî ng'Ekeleeziya udibo baseka to, badi baseka Yesu. "Udi uNkengesha bwa cinyi?" Mmunyi muvwa Pòlò pa dîbà adi, ne mamanya ende ônsò a mu mutu awu, mwa kwitabuujà ne Eci civwa . . . ne Cisumbu civwaye wenda ukengesha eci ke Nzambi mwine uvwaye wamba ne udi ukwacila mudimu? Ndi ngela meeji ne aci cidi, nciyi nya mu disunsulula dya bwalu to, ngela meeji ne twètù bônso tudi balongeshiibwe bikumbane bwa kumanya cîndi njinga kwamba mwab'ewu. Cintu cimwecimwe aci ncidi ncyenzeka leelu wa Ndaaya ewu.

76 Pòlò, ku dipanga, nansha nanku uvwa ne luumvu ne meeji matwe, ne meeji matwe kupita beena Ngalela bavwa kabayi balonge tulaasa bavwaye ukengesha abu, bàkaavwà mu didipwekesha dyabo bamane kwakidila Muntu ewu bu Mukalenge. Kadi, Pòlò, mu dilongeshiibwa dyende dinene ne mamanya ende a mu mutu awu, kavwa mwa kwitabuujà Aci to. Kadi ndikuvumuka kaayi divwa ne cya kwikala dimwenzেকে, mu njila ewu. Ne yêyê wakavwijiiibwa mpofo, mu mushindu wa kaciyi kabidi mwa kufikisha mudimu mumutuma naawu awu kundekeelu to, kadi baakaya nende benda bamulombola too ne ku kaaba kampanda mu mùsèsèsù uvwa dînà ne Mululame, ku nzubu wa muntu kampanda.

77 Ke pashiishe muprofeta kulwaye, dînà dyende Ananiya, wâkamona mu cikeena-kumona, yêyê wenda upweka awu, kumonaye kuvwaye usanganyiiibwa, kupweka kuyaye kuvwaye usanganyiiibwa aku, ne kubwelaye. Kwambaye ne: "Mwaneetu Shawula, Mukalenge mmukumwenেকে paupwa wenda upweka ne njila; mmuntume mêmè, bwa nkutentেকে byanza, bwa upetulule lumono lwebe ne uujiibwe ne Nyuma Mwîmpè."

78 Monaayi kukaavwaye. Ebu's mbwalu bwa—bwa dikema budi ne cya kwikala bwenzেকে Pòlò! Nwamonu anyi? Biine byônsò byakalongeshiibwaye bwa kwenza abi byakalwa bikudimukangane. Pa nanku mpindyewu, ne—ne tulaasa twônso twakalongaye atu, bya—byakalwa anu cijengu cyetu eci kudiye.

79 Mpindyewu, wakamanya ne civwa ndilabula yêyê mwenze. Pa nanku dileesona dikwabo dîmpè ndyedi bwetu twètù, dya ne, dilabula nkaayaadi kî ndikumbane to. Bikengela ciikale dilabula bilondeshile Dîyî dya Mukalenge. Pa nanku, yêyê paakamonaye cyôcì eci, ne paakamanyaye ne Civwa n'Cintu kampanda cya cinene, pa dîbà adi, ne kampanda mukwabo ukaavwaku mudyanjile kuCipeta kumpala kwende yêyê, kwangataye bidimu bisatu ne ngondo isambombo mwamwa mu cipeela cya Arabie; kwangataye anu—anu Bible, mu mushindu uvwaYe musangu awu, Dipungila Dikulukulu, nenku kupwekaye muntwamu, bwa—bwa kufwanyikijaye dilabula dyakapetaye edi, bwa kumona ne Divwa dya mu Mifundu anyi.

<sup>80</sup> Mpindyewu ambăyi tũng bu yêyè mwambe ne: “Ee, ngela meeji ne civwa anu nkaadikubakuba kakese cyanaana,” kadi kutungunukaye anu lwendu? “Mêmè nêndondè bya mu mutu wanyi?”

<sup>81</sup> Mpindyewu, byakakengela abwele mu buloko bwa cintu kampanda, mwena buloko. Nenku paanyima paa mumane kucifwanyikija, ne kumona, kabyena bikemesha to paakafikaye ku difunda dya Mukanda wa Ebelu, mu cifwanyikijilu. Nwamonu anyi? Bidimu bisatu ne citupa kuntwaku, mudyădije anu mu Dîyi, ne ujandula ne Nzambi mwine uvwa mumubiikile awu uvwa munkaci mwa kumwaluja, ne ushintulula byônsò byende bya mu mutu abi, ushintulula byônsò bivwayeku mwelele meeji abi, byônsò bivwaye mulongeshiibwe bwa kwikala abi. Kiipacila kende kônsò aku, kubikupula mu mutu wende, nenku kushaalye mwena buloko. Dinanga dya Nzambi dikaavwa dinene diye ne mwa naka, ne dibuulula dya—dya mushindu awu, mu mushindu wa kayiku mwa kushiyangana naaDi to.

<sup>82</sup> Ke dilabula dilelela dya mwena Kilisto yônsò wa cya bushuwa ewu udi usambakeena ne Nzambi ndyadi. Udi—udi utwilangana ne Cintu kampanda cya cinenaanenaale, mu mushindu wa wêwè...wa—wa ushaala mwena buloko, ku bikwabo byônsò. Nwamonu anyi? U—ushiyangana ne byônsò, bwa wêwè kudyela mu buloko bwa Cyôci eci.

<sup>83</sup> Cyakambiibwa musangu kampanda uvwa Yesu mwambe ne: “Bukalenge bwa mu Dyulu budi cintu kampanda cifwanangane ne muntu udi usumba masanga. Kadi padiye usangana Disanga dya dinene adi, usumbisha byônsò bidiye naabi, bwa kupeta Dyôdi adi.”

<sup>84</sup> Nenku mushindu awu ngudibi mwaba ewu. Udi—udi ne mmwenenu wa mu mutu, upeta dilabula dya maalu a Nzambi a mu tulaasa; kadi pakaadibi bikafika pa dîbà kampanda dyûdi ukapeta Cintu cya bushuwa, udi—udi usumbisha anu bikwabo byônsò, ne udikangila nkaayeebe bwa Cyôci eci.

<sup>85</sup> Pôlò wakamanya ne civwa ncinyi. Wa—wakajandula ne ukaavwa muswikila ku Cintu kampanda. Mushindu ututu twela kabalu mu nkanu ya bukontononyi, bidi mbwa—mbwa kôkò kukoka cintu kampanda. Nenku Pôlò wakamanya, paanyima paa dilabula edi, ne bidimu bisatu ne citupa bya difwanyikija dya dilabula dyakenzaye adi, ne Bible, wakafika ku dyumvwa ne Nzambi wakamusungula ne wakamuswika ne nkanu ya Nyuma Mwimpè, dilabula dyakenzaye adi, bwa kukokaye Evanjeeliyo kumpala kwa baa Bisamba bya bende. Nyuma, Yêyè mwine, ngwâmuswika.

<sup>86</sup> Nenku, leelu ewu, bu basadidi baa Kilisto, tudi tushaala baswikiibwe, bakalamija. Katuyi mushindu wa kuya to. Batutuma eku ne eku anu ne Cyôci aci, baswikila ku Dîyi. Nansha nî nganyi mukwabo mwambe cinyi, udi anu muswikila



ku Dyôdi adi. Kudi cintu kampanda ku Dyôdi adi, cya ne kuyiku mwa kuDishiya to. Ukaadi mwediibwe mu cikokedi cimwe naaDi, kudi Nyuma Mwîmpè, mukuswikile mu cikokedi ku Dîyi. Nansha nî nganyi mukwabo mwambe cinyi, anu Dîyi. Aci citu misangu yônsò anu ciswika pamwe ne Dyôdi adi, cyela mu cikokedi ne Dyôdi adi. Ku Dîyi, ku Nyuma, ke kukaavwaye muswikiibwe.

<sup>87</sup> Ukaavwa muyiile lwa ku—ku luseke lukwabo lwa cipeela cya Arabie aku. Pa dîbà adi, bintu byende byônsò bya kumpala abi, ne malabula awu, ne twipacila, ne, bakaavwa bamuvuule bintu abi.

<sup>88</sup> Mpindyewu, ke mwaba awu utudi tusangana, leelu ewu ne, bikengela bânjî kutuvuula, dyambedi. Kadi bantu kabatu baswe kuvuudiibwa to. Mwaneetu wa ba-Méthodistes mmuswe kushaala kacya walamata ndambu ku dilongesha dyende dya ba-Méthodistes. Uh-huh. Mwaneetu wa ba-Baptistes mmuswe kushaala kacya walamata ndambu ku dilongesha dyende dya ba-Baptistes. Nwamonu anyi? Kadi kakuyi mpatà to bikengela bakuvuule bintu byônsò, wikale anu mulediibwe cyakabidi, cyakabidi. Nenku kwashila lwendu mwaba awu, ushiila Nyuma Mwîmpè bulombodi. Kuyi mwa kwamba ne: “Ee, mpindyewu, papa wanyi—wanyî wakamba ne, paakabwelaye, paakabwelaye mu ekeleeziya, wakalabula mpaasata ku cyanza. Yêyè, yêyè utu cidimba cîmpè cya lulamatu.” Aci civwa cifwanyine kwikala cikumbane bwa cisa cyabo bôbò, kadi twêtù tudi beena cisa cikwabo. Nudi numona anyi? Mpindyewu butudi naabu mbwa kwalukila ku bikondo bya Bible bwa dituku edi.

<sup>89</sup> Baakwidi bavwa baswikiibwe, bôbò paabo. Kadi, nudi numona’s, bakaavwa babwele mu cipungu cikwabo, kadi ba—bapange mwa kuvuula nkanu yabo ya kale ne kuvwala nkanu mipyamipya.

<sup>90</sup> Nenku cintu cimwecimwe aci ncitudi tusangana leelu ewu. Tudi cya bushuwa bapicile mu cikondo cya cyena mangumba, bu mutwajaadiki mu kulonga kwa bikondo bya ekeleeziya, Bible, ne bikwabo, kadi tudi bafike mpindyewu mu cikondo cidishikamine, mudi Nyuma Mwîmpè Yêyè mwine mwikale upweka ne udishindikila Yêyè mwine, ne udimanyisha Yêyè mwine, wenza bwa ne mulayi wônsò wakalayaYe, ukumbane. Kaa, ekelekele! Ncikondo kaayipu cya butumbi eci’s we!

<sup>91</sup> Nenku yêyè wakamanya ne, cîngà cintu, wakamanya ne kavwa ne mushindu wa kuya ku myaba kampanda to. Ne, bu muvwaye muswikiibwe ku Cyôci eci, yêyè kaakwikala mwa . . . civwaye wenza, kadi pende’s uvwa—uvwa ujinga kukuya. Wakamanya ne kiipacila kende kavwa kamukoka munkaci mwa bânà baabo muvwaye mubiikidiibwe bwa kulwa, kadi mwikale musakiibwe mu Nyuma bwa kwenza cîngà cintu. Kacivwa muntu wa yêyè mwine to.

<sup>92</sup> Pàmwápa muntu uvwa mufwanyine kwamba ne: “Mwaneetu Shawula, Mwaneetu Pòlò, tudi baswe ulwe kuneeku, bwalu twètù mbadi ne ekeleeziya udi mutambe bunene. Twètù mbadi ne disangisha ditambe bunene. Milambu yakwelelabo neyiikale mivumvuke, ne bikwabo.”

<sup>93</sup> Kadi bu muvwaye usakiibwa mu Nyuma, uvwa udyambidila ne: “Ndi ne mwaneetu kuntu kwaka. Ndi njinga nkuye bwa kasungila mwaneetu ewu, mmufikishe kudi Mukalenge.” Kadi, nansha nanku, Nyuma uvwa anu umusaka bwa kuyaye kwa cyanaana. Uvwa mwena buloko. Menemene.

<sup>94</sup> Éyi Nzambi, tuvwijeku beena buloko baa mushindu awu, utuumusha ku twipacila twetu twètù twa budisu atu, ne ku yetu mishindu ya dicinkilangana ne wetu mushindu wa mutambe bwimpè wa didyelela meeji awu, bwa kwikala mwena buloko wa Yesu Kilisto. Ndi ngela meeji ne aci civwa ncishimbi-dìyì, cya ne: “Ndi mwena buloko wa Yesu Kilisto.”

<sup>95</sup> Nenku vulukaayi ne, Yêyè udi Dìyì. Nwamonu anyi? Nansha muntu kampanda mukwabo mwele meeji kaayi, Dìyì ke didi ne bwalu. Nwamonu anyi? Wèwè mwikale mwena buloko wa Dìyì, dingumba nansha dimwe kadyenaku mwa kukutankakaja kuumushaKu to. Dìyì ke didi—ke didi ne bwalu. Udi anu. . . Udi mwena buloko wa Dyôdi adi, kwajiki. Bùdi naabu mbwa kwenza maalu mudi Dyôdi adi dyenza.

<sup>96</sup> Mpindyewu, kavwa mwa kuya ku mîngà myaba ivwaye muswe kuya ayi to, bwalu (bwa cinyi?) Nyuma uvwa umukandika. Nudi bavuluke ne, misangu yàbûngì, Pòlò uvwa uteeta kuya mwaba kampanda, udyambidila ne: “Ke kùndi mufwanyine kwenza disangisha dinene,” kadi Nyuma uvwa mwa kumukandika. Mpindyewu, aci cidì cyamba ne cijaadika patooke ne Pòlò uvwa mwena buloko anyi? [Disangisha didi dyamba ne: “Amen.”—Muf.] Mwena buloko wa Yesu Kilisto, muswikila ku Dìyì Dyende, kudi Nyuma! Kaa! Ndi muswe aci. Uh-huh.

<sup>97</sup> Uvwa muswikiibwe. Uvwa muswikiibwe ne munyoololo, ne nkanu ya dinanga, bwa kwenza diswa dya Nzambi, ne anu dyôdi nkaayaadi. Uvwa mwena buloko. Uvwa mu nkanu ya dinanga. Uvwa mu cikokedi cimwe ne Kilisto. Kavwa mwa kwenda mu cikokedi cimwe ne cintu cikwabo nansha cimwe to. Uvwa mwediibwe mu cikokedi cimwe Nende. Nenku kuvwa Bulombodi buya aku, ke kuvwa kumukengela kuyaye. Nansha muvwa maalu matambe kulengela, *eku* anyi *eku* amu, bivwa bimukengela kulondaye njila muvwa Mulombodi ne cikokedi byenda biya amu.

<sup>98</sup> Kaa, diloolo edi, twètù, bu Branham Tabernacle, twikalapù mwa kulwa beena buloko; ku ngiikadilu wetu twètù wa budisu, ku kiipacila keetu twètù, bwa twamona mwa kudilekelela mu kaabujima ne kwediibwa mu cikokedi baswikiibwe kudiYe,

nansha bakwabo baa pa buloba mwa kwela meeji a bishi, nansha bakwabo baa pa buloba mwa kwenza cinyi. Twétu tudi beediibwe mu cikokedi cya nkanu ya dinanga. Tudi beena buloko. “Makàsà aanyi mmatambe kweediibwa mu cikokedi cya Kilisto, mu mushindu wa kaàyi mwa kujaku maja to. Mèsù aanyi mmatambe kweediibwa mu cikokedi cya Kilisto, mu mushindu wa ne mèmè, pândi anu mmona baji baa maja badi bavuula ne bilàmbà baa cyena leelu aba mu mùsèèsù, Cyòci aci cidì cituma mutu wanyi ku luseke. Mwoyi wanyi mmutambe kweediibwa mu cikokedi mu dinanga ne muswikiibwe kudiYe, mu mushindu wa nciyiku mwa kwikala ne dinanga bwa maalu a pa buloba ebu to, cyakabidi. Diswa dyanyi nditambe kweediibwa mu cikokedi Cyende, mu mushindu wa nciyiku mene mmanya mpindyewu ne twipacila twanyi tudi cinyi to. Anu ne: ‘Kwònsò kuwalombola Wèwè aku, nëndondè, Mukalenge.’ Nèngikalè mwena buloko.” Nwamonu anyi?

<sup>99</sup> Pòlò uvwa mwena buloko anu wetu wa menemene ewu. Kavwaku yèyè upatula byakulaakula bya cyanaana to. Uvwa mulongeshiibwe kudi Nyuma Mwîmpè, kabidi, bwa kwikala kwindila Dîyi. Mpindyewu, ukaavwa mumana kulongesha mu mushindu kampanda, kadi—kadi Nzambi uvwa mumulongeshe mushindu mukwabo mpindyewu. Uvwa mulongeshiibwe kudi Nyuma Mwîmpè bwa kwikala kwindila Mukalenge, nansha twipacila twende twikale cinyi.

<sup>100</sup> Mpindyewu nèngikalè, ku dikwacisha dya kudi Nyuma Mwîmpè, mwa kunuleeja cintu kampanda. Nwamonu anyi? Mpindyewu twànji twangataayi cileejilu kampanda.

<sup>101</sup> Dîngà dituku, Pòlò ne Siila, benda bapweka ne mùsèèsù mu cimenga kampanda muvwabo benzela ditabuluja. Ke kànà kaa bakaji kakwabo, kakwata kudi badémons ke kwenza kenda anu kamulonda, kenda keela mbila paanyima pende. Nenu kakuyi mpatà to bwa ne Pòlò uvwa mumanye ne uvwa ne bukookeshi, yèyè bu mupostolo, bwa kutandisha nyuma mubi awu kumwipata munda mwa mukaji awu. Kadi nukaadi bamone anyi? Kwindilaye, ku dituku ne ku dituku, too ne, dyakamwe, mwavu Nyuma Mwîmpè kwakula nende, wamba ne: “Ke dîbà ndyòdi edi.”

<sup>102</sup> Ke yèyè ne: “Wèwè nyuma, patuka munda mwende.” Nudi numona anyi? Uvwa mumanye mwa kwindila Mukalenge.

<sup>103</sup> Nenu ke mwaba awu udi bantu bààbûngì leelu wa Ndaaya ewu bafwisha Dîyi bundu. Badi bapatuka baya biikale ne kiipacila kampanda. Mmatabuluja bûngì kaayi akaadi mashiyashiya ciipanshi cyetu eci bwa bwalu bu nanku, bwalu mutangadiki kêna windilaku bwa kumona cidì Mukalenge ne cya kwamba to! Bamwe baa kudibo badi bamba ne: “Vwila kuneeku,” paabo—paabo bamba baya anu dyakamwe bwalu nsangilu wàmbi ne: “Ndaaku.” Pende Nyuma Mwîmpè’s uvwa

mufwanyine kwamba cintu kampanda cishiilangane. Kadi, kiipacila kaa muntu awu bwa kulwaye mukulu wa ditunga, anyi—anyi cintu kampanda cikwabo, anyi mukulu wa mushindu kampanda, anyi mwepiskopo kampanda, anyi cintu kampanda cifwanyine kumukoka ne: “Udi ne cya kuya.” Nenku, nansha nanku, yêyè’s mmumanye cidi citambe bwîmpè. Nyuma Mwîmpè mwikale wamba ne: “Nda *eku*.” Nwamonu anyi? Mmwediibwe mu cikokedi cya bulongolodi bwende. Mmwena buloko wa bulongolodi abu.

<sup>104</sup> Kadi yêyè mwediibwe mu cikokedi muswikiibwe kudi Kilisto, udi ulombodiibwa kudi Nyuma Mwîmpè. Yêyè...?... Nudi numona anyi? Yêyè, mmuswikibwe ku cikokedi, mwena buloko. Cidi muntu kampanda mukwabo wamba kaciyena ne cidici cishintulula to; cidi—cidi anu—cidi anu—anu bu mwadi wa cyamu cya kabanda ne byamu bidibo bakumakaja. Yêyè udi uteeleja anu Dìyì dya Nzambi, ne udi wakula anu padi Dyôdì adi dipatuka. Kêna wamba bwalu nansha bumwe to.

<sup>105</sup> Muntu kampanda wamba ne: “Kaa, kaa, Mwaneetu Jones!” Mwaneetu Roberts, anyi kampanda, bantu banene aba mu ditunga dyetu edi leelu wa Ndaaya ewu, bu mudi Tommy Hicks, anyi—anyi—anyi Oral Roberts, anyi—anyi Mwaneetu Tommy Osborn, bamwe baa ku batangadiki banene abu. Muntu yêyè mwa kwamba ne: “Amba tŭng, lwâ kuneeku’s, Tommy. Wêwè ewu’s udi muntu munene wa Nzambi.” (Anyi Oral.) “Nenku mêmè—mêmè nyewu ndi ne—ne taatù mukwabo mulaadika mwab’ewu, mu—muswikiibwe bikole. Nyawu udi—udi usaama. Ndi muswe bwa wêwè kulwa. Ndi ngitabuuja ne wêwè udi ne dikanda dya kumwondopa.” Nwamonu anyi?

Pàmwâpa Nyuma Mwîmpè mmufwanyine kumwambila ne: “Mpindyewu to.”

<sup>106</sup> Kadi, nansha nanku, anu bwa bulunda budiye naabu ne muntu awu, yêyè’s mmuswikiibwe bwa kuyaye nende. Yêyè kayi muye to, udi ushaala mwena lukuna kudi muntu awu. Muntu awu mmufwanyine kwamba ne: “Ee, yêyè wakaya kudi *kampanda*, e kwondopaye mwânà awu anyi mwânà wa balume awu. Mêmè’s ndi mumanye ne wakaya. Kadi mêmè ewu utu mulunda wende, wa bidimu, nwamonu’s, kayi uswa kulwa kwanyi kumbelu mêmè to.”

<sup>107</sup> Kadi piikalaye mwenzeja ku bukole kudi Nyuma Mwîmpè bwa kayi to, mbîmpè kayi to, piikalaye muswika ku cikokedi cya Nzambi. Mulunda wende, udi anu mumunange. Kadi bikengela ikale mulombodiibwe kudi Nyuma Mwîmpè bwa kukuya, bwalu kabyakwenza cintu cîmpè to, twamb’eku twamb’eku. Mêmè ntu mulabulelabule bya nanku misangu bûngì cyanaana.

<sup>108</sup> Kadi Pôlò yêyè uvwa anu windila bwa Nyuma amwambile cya dyenza. “Mwindile Nyuma,” muvwaye wamba. Wakashaala kacya wimana bufuku kampanda, uyiisha. Ke kupatukaye

muntwamu. Kumonaye muntu mulume mukwabo mwikale cikalaba. Ke dyakamwe, Nyuma kwakula nende, ke yèyè kwamba ne: “Ndi njingulula.” Mushindu kaayi? Mushindu umweumwe wakajingululaye ne bavwa mwa kupeta njiwu ya mazuwa awu, mu cisanga kampanda. Nwamonu anyi? “Ndi njingulula ne wêwè udi ne diitabuuja dya kwondopiibwa. Juuka wimane kuulu. Yesu Kilisto wamanya kukwondopa.” Nwamonu anyi? Ke bwalu abu’s. Yèyè—yèyè uvwa . . . Uvwa muswikiibwe ku cikokedi. Uvwa mufwanyine kwikala mwenze ditabulujaja dya lumingu lujima muntwamu kadi cintu nansha cimwe kaciyi cyenzeke to, kadi wakindila bwa Nyuma Mwîmpè ämbè dîyi. Nwamonu anyi? Yèyè uvwa muswikila ku cikokedi cya dibiikila adi.

<sup>109</sup> Mpindyewu wêwè udi wamba ne: “Mwaneetu Branham, wêwè’s ukaadi upiisha cyûvwà wamba mu dyalumingu aci, cya ne udi wêwè anu kacya wîndila cikondo cyônsò eci.”

<sup>110</sup> Nenku, kadi, wavuluka ne, uvwa n’Nyuma Mwîmpè uvwa mwakule naanyi mu njila mwamwa, wamba ne: “Ndi nkutuma nkupingaja munkaci mwa babeedi ne beena ntatu.” Nwamonu anyi? Nkwikala ne butumike kudi Nyuma Mwîmpè. Cya bushuwa. Ncivwa nya pavwaYe kayi mungambile ne nye to. Mvwa mwindile EMU MMUDI MUKALENGE WAMBA, too ne pângâavu kupeta EMU MMUDI MUKALENGE WAMBA. Mpindyewu, aci’s ncishiilangane. Nwamonu anyi? Mpindyewu, Cyôci aci, Aci cidi cyenza dishiilangana. Eyo.

<sup>111</sup> Yèyè uvwa windila Dîyi dya Mukalenge. Uvwa usakiibwa mu Nyuma, bwa kwenzaye anu dîyi dituma dya kudi Nzambi, pa dîbà adi ke kushaalaye mwena buloko wa Yesu Kilisto. Balunda baanyi, twîkalapù mwa kushaala beena buloko’s we!

<sup>112</sup> Ndi mumanye ne kudi luuya lukole. Kadi ndi—ndi muswe kuteelaku bantu bakwabo babidi, bu nwènù mwa kuswa. Ndi naabo batwe ku basambombo anyi mwandamukulu bafunda mwab’ewu. Kadi ndi—ndi muswe kuteela mukwabo muntu umwe anyi babidi cyanaana.

<sup>113</sup> Twangataayi muntu bu Mòsà. Wakalediibwa bu musungidi. Ne yèyè mwine uvwa mumanye ciine aci ne, wakalediibwa bu musungidi.

<sup>114</sup> Kadi kumpala kwa mêmè kwamba bwa Mòsà, ndi njinga kwamba dîyi edi, ne, bitu bikengela misangu yônsò bwa Nzambi kwangata muntu kana yônsò ewu, wîkala mwa kuMukwacila mudimu bulelela, bwa kwikalaye mwena buloko Wende. Bikengela muntu alekelele kiipacila kônsò kadiye naaku, cyônsò cidiye, kantu ne kantu kônsò—kônsò, nsòmbelu wende, musuuka, mubidi, diswa, twipacila, ne bikwabo byônsò, ne kushaala mu kaabujima, mwena buloko wa Kilisto, Yèyè udi Dîyi, bwa kukwacila Nzambi mudimu.

115 Mbifwanyine kwikala bikengela wêwè kwenda mushindu ubengangana ne dyebe didicinkila dya ditambe bwimpè adi. Pàmwăpa, mu bulongolodi kampanda, wêwè udi mufwanyine kwikala udyambidila ne mbafwanyine kukubandisha mwânzù ne kukupa cintu kampanda cya cinene, cyûdi mufwanyine kudileeja naaci. Kadi ncinyi cyûdi udisangana? Udi udisangana ukaadi mucimunyiibwe, paanyima paa matuku, anu too ne padi Nzambi ufika ne ku dipeta muntu udi muswe kushaala mwena buloko Wende.

116 Nzambi udi munkaci mwa kukeba beena buloko. Ke cituYe mwenzenze misangu yônsò. Nudi bafwanyine kucikenketa mu Mifundu. Bikengela muntu ikale mwena buloko wa Kilisto, bibengangana ne cintu kana cyônsò. Ke bwa cinyi, kwêna mwa kwikala muswikakaja ku cintu kana cyônsò to pa kuumusha Kilisto; nansha tatwêbè, mamwêbè, mwaneenu wa balume, mwaneenu wa bakaji, bayeebe, mukajebe, anyi nganyi. Wêwè udi muswikakaja anu kudi Kilisto, ne anu Yêyè nkaayende, pa dîbà adi Nzambi udi mwa kukwata neebe mudimu. Kumpala kwa dîbà adi, kwêna mwa kwangula mpasu to.

117 Pântù mpatuka, misangu mikwabo ntu ngamba bantu mēyi mashile. Nwamonu anyi? Ndi—ndi nkeba bwa kunufikisha ku dikosoloka. Bikengela wikale ne mwaba ûdi ubangila, bu mudi misangu mikwabo ditandishatandisha dya bakaji badi babebula nsuki yabo ne bavwala bilâmbà ebi, kadi biikale anu kacya baakwata ne baalama ditonda dyabo mudibo beena Kilisto. Bamba ne: “Aku’s nkantu kakese.” Ee, bikengela ubangile mwaba kampanda’s. Pa nanku bangila piine apu, ne ABC yebe’s. Nwamonu anyi? Nanku kosoloka ne mmwenekelu ya pa buloba ayi, twamb’eku twamb’eku, nenku ushaale mwena buloko wa Kilisto. Nanku tungunuka anu kutungunuka, ukosoloka ne bintu byônsò, too ne ndekeelu wa byônsò piikala nshinga wa ndekeelu ne cya kwikala mukosa. Pa dîbà adi udi—udi. . . Udi mwena buloko pa dîbà adi. Udi ushaala Yêyè mwikale anu kacya wakupya. Yêyè, Yêyè wamanyi kushaala kacya anu wakupya.

118 Mpindyewu, Môsà uvwa mumanye ne wakalediibwa bu musungidi awu. Uvwa mucimanye. Kadi nukaavwaku bamone, ne kiipacila kavwa Môsà naaku; mumanye ne mamwëndè ukaavwa mumwambile kwaka naka, bu muvwabi ne yêyè ke uvwa mamwëndè mudiishi.

119 Kakuyi mpatà to, paakalediibwa Môsà mwânà mukese wa mu diboko awu, ke paakamwambila mamwëndè ne: “Udi mumanye, wêwè Môsà, pavwa. . . Tatwêbè Amram, ne mêmè, tuvwa tusambila ku musangu ne ku musangu. Tuvwa bamanye, ne twâkamôna mu Diyì ne, dîbà dya dilwa dya musungidi awu dyakakumbana. Ke twêtù kusambila ne: ‘Mukalenge Nzambi, tudi baswe kumona musungidi awu.’ Bufuku kampanda, ke Mukalenge kutwambila, mu cikeena-kumona ne, wêwè uvwa ne cya kulediibwa, ne newikale musungidi awu. Katwakapeta

bwôwà bwa mukenji wa mfumu nansha. Katwakacyuka civwa mfumu mwambe to. Pa díbà adi, twètù kumanya ne wèwè uvwa mulediibwe bu musungidi. Mpindyewu, Mòsà, tuvwa bamanye ne katuvwa mwa kukukolesha mu mushindu mujaalame to.”

<sup>120</sup> Mpindyewu vulukaayi ne, bakaavwa muntwamu, bidimu nkama inaaayi mu Ejipitu amu. Nwamonu anyi?

<sup>121</sup> “Nenku twètù—twètù tuvwa ne dijinga dya kukupa cintu cijaalame, nkoleshilu mujaalame, dilongesha dijaalame. Pa nanku, mèmè kukwangata e kukwela mu kaabwâtù kakese, ne kuya kakuteeka pa musulu wa Nil. Kadi bwalu bwa dikema, ke nkakwa kwangata kaabwâtù aku kukapwekeshila mu malenge ne nkodi, ne kukapwekeshila too ne kwinshi, ntanta wa makilomeeta, kadi kukanyungulula e kukabweja ne mu nzubu wa bukalenge wa Pâlò, muvwa wende. . .muvwa mwânà wa bakaji wa Pâlò, pavwa dijiba dyende dya dyowela màyi. Ne muvwabi ne—ne mvwa mumanye ne neikale dijinga ne mukaji wa kukukolesha.”

<sup>122</sup> Nenku mu miine matuku awu, mu bushuwa bwa bwalu, kabavwa ne tundundu twa kwamushila bânà etu to, pa nanku bivwa bikengela kwangataye ndeji mwamushi. Nenku. . .

<sup>123</sup> “Nenku, Miriam, mèmè kumutuma kwinshi aku. Ke kushaalaye mwimane mwaba awu, kwambaye ne: ‘Mèmè ndi mumanye kùndi mwa kupeta ndeji mwamushi,’ ke kulwaye kungangata mèmè. Nenku, Mòsà, biibi byònsò mbikanga. Munanga wanyi, ukaadi ne bidimu dikumi ne bisambombo mpindyewu, kadi wèwè ke wíkala mwânà wa balume wa Pâlò. Nenku kumpala eku wèwè ke wíkala musungidi wapatula cisamba eci kucyumusha muneemu emu.”

<sup>124</sup> Twipacila twa Mòsà kubangatu kubanda. “Nêndongè kalaasa, mààmù. Nêndongè byònsò bîngìkalà ne mushindu wa kulonga abi. Udi mumanye cîngènà? Nêndongè mwa kushaala musalaayi, nenku nêmmanyè mwa kupatuka ne bantu aba muneemu. Nêngìkalè kalààlà kaa basalaayi, mwepiskopo, nenku nêmmanyè mushindu wikalabi mwa kwenzeka. Nenku nêmmànè—nêmpâtùkè ne cisamba aci. Nêmpetè mapolome aanyi a Ph.D. anyi LL. Ke cîngènà.”

<sup>125</sup> Byenze bu “Mùmpeelè Chiniquy,” piikalabi ne nukaadiku babale mikanda yende. Eyo. Yèyè ke “wasungila beena Mishònyì bònsò,” nudi bamanye, kadi kulwa kushaalaye umwe wabo, yèyè mwine. Pa nanku, nsaserdose munene ewu, kukaadi bidimu, “Mùmpeelè Chiniquy,” bivwa bikengela nwènù kupetaku mukanda wende bwa kuwubala. Bamubiikila ne, “mùmpeelè.” Yèyè udi m’Mwaneetu Chiniquy, muvwabi. Twètù katutu tubiikila muntu ne “mùmpeelè” to, mushindu awu. Pa nanku tudi tusangana ne—ne twètù. . .Uvwa ne cya kubala Bible, mu mushindu awu uvwa upatuka kwaka bwa kuleeja bubi bwa ntendelelu wa cyena Mishònyì kadi kubavwija bònsò

beena Katolike. Kadi mmwenze anu uya kabala Bible anyi, Nyuma Mwîmpè kumutuulukila, ke kupetaye Nyuma Mwîmpè, ke pa dîbà adi—pa dîbà adi kulwaye umwe wabo.

<sup>126</sup> Pa nanku monaayi bwalu ebu ne, Mòsà kupeta dilongesha dyònsò adi. Bwalu, yèyè—yèyè uvwa mumanye. Uvwa ne meeji matwe be, mulonge tulaasa dikema, ne mamanya a mu mutu bûngi cyanaana! Mu mushindu wa ne, kakuyi muntu nansha umwe. . . Uvwa mukumbane nansha kulongesha beena Ejipitu. Mu mushindu wa ne, uvwa mwa kulongesha ne bamanyi baabo bapiluluke baa maalu a nsòmbelu. Uvwa mwa kulongesha tulaàlà twabo twa basalaayi ne civwa bukole bwa busalaayi ncinyi. Uvwa muntu munene. Ne bantu bavwa baciina Mòsà awu, bwa bunene bwende. Kaa, tulaasa tulonga twa mushindu awu! Ekelekele! Uvwa mwepiskopo munene, anyi pàmwápa anu bu paapà mwine. Uvwa kabambaayi munene. Ne uvwa muntu wa bukole. Ne uvwa mumanye ne uvwa mulediibwe bwa kwenza cyòcì eci, ne ukaavwa mulongeshiibwe, ne kiipacila kanene, bwa kucyenza.

<sup>127</sup> Byenze anu mudi leelu ewu. Ncyèna ngamba ne, bantu badi balongehiibwe mu tulaasa etu aba, ncyèna ngamba ne. . . Byenze mudibo basanganyiibwa mu Wesete emu mpindyewu, badi baswa kwibaka cilongelu cya maalu a Nzambi cya ciyiila ndola miliyò lukama ne makumi ataanu, nwamonu's, cya beena Mpenta, ci—cilongelu cya ciyiila ndola miliyò lukama ne makumi ataanu. Bwanyi mèmè, ayi's ivwa ya batuudila ba-missionnaires mu budimi bwa bwambi's. Nwamonu anyi? Nwamonu anyi? Nwamonu anyi? Kadi, byòbì biine, cidibo benza ncinyi padibo bapatuka mwine amu? Badi cinyi? Musumba wa ba-Rickys. Cya bushuwa menemene. Ne pa dîbà adi mushindu awu ke udibo bamupatuka. Ke mutubi misangu yònsò, bakwabo baa kudibo, kabidi cidi anu ndelanganyi yòyì imweyimwe ayi. Nwamonu anyi?

<sup>128</sup> Mpindyewu tudi tujandula, ne, piine apu, Mòsà, mu kulonga kwende kwònsò eku, ne leelu ewu, ne kulonga kwònsò eku, nuvwijangana bepiskopo banene ne bikwabo, kiipacila kanene, katumbuke, citwenza ncinyi? Twipacila twetu twamba kulwa menemene anu muvwa twa Mòsà atu. Nwamonu anyi?

<sup>129</sup> Nzambi, kumpala kwa Yèyè kupeta muntu awu mu cyanza Cyende, bivwa bikengela kwanjiYe kumuvuula kiipacila kende aku. Bivwa bikengela kwanjiYe kumuvuula malonga ende ónsò awu.

<sup>130</sup> Kupatukaye cya bushuwa, ne kusungilanganaye; kushipaye mwena Ejipitu umwepele. Nenku yèyè, nenku paakenzaye aci, kujandulaye ne uvwa mu ntupakanyi. Kavwa mwa kwenza aci to. Kí mmushindu awu uvwabi to. Ke kukengelabi bwa Nzambi kumupatula kuya nende mu cipeela, mu cipeela, mu mwaba wa cipeela.



<sup>131</sup> Nudi numona, byenze bu bidi bikemesha's, mushindu udi balumyana aba, badi Nzambi naabo ne mukenji kampanda. Udi uya naabo mu cipeela.

<sup>132</sup> Wakaya ne Pòlò mu cipeela, bwa kumulongesha, bwa kumwambila ne cikeena-kumona cinene cyònsò aci civwa ncinyi, pambelu mu cipeela. "Patuka uye mu cipeela kampanda." Ke kushaalaye muntwamu too ne paakamupa Nzambi dimanya mu kaabujima dya cya dyenza.

<sup>133</sup> Nenku cikondo cya Mòsà, Yèyè kumupatula kuya nende mu cipeela. Kumulama kuntwaku munda mwa bidimu makumi anaayi, ne kumuvuula dimanyina dyende dyònsò dya Nzambi dya mu tulaasa adi ne kiipacila kende kònsò aku. Kaa, cikondo kaayi's we, civwaye mwa kupingaja mèsù paanyima kumona dipangila dyende. Ne twètù, diloolo edi, muvwabi bikengela twètù kwenza cintu cimwecimwe aci, patudi tumona kiipacila keetu.

<sup>134</sup> Tangilaayi kampanye kaa dyondopa, numone ne Mukalenge mmwenze bushuwa cintu kampanda mu ndambu wa bidimu bishaale ebi, bwa kubanga kwalujulwila babeedi dyondopa, ne bikwabo.

<sup>135</sup> Bantu bònsò, bulongolodi ne bulongodi bwònsò, anu bwalu Cyòcì aci kî ncibwele mu bulongolodi bwabo to, byakakengela badipetele mwondopi kampanda. Kadi citwalu kwenza ncinyi? Twǎnjàayi kutangila bwalu abu katanci. Twálu kwenza cintu cimwecimwe cyakenza Mòsà aci. Tudi bapatuke kadi kwenza ne mwetu mwònsò bwa kukwatakaja cishima cya mushindu kampanda. "Ndi mununkile muumvwe mupuuya wa disaama. Ndi—ndi—ndi ne mashi mu cyanza cyanyi emu," kadi kukwatakaja cishima. Nwamonu anyi? Kadi citwapeci ncinyi? Bamwe baa ku bantu biikale mu dilubakana dikole, mbaabulukangane kadi kulwa bakwaciki baa maala baa matuku ònsò, banyunguluke mitu, ne bakudimune meeji abo. Nenku mbakudimuke baalukile cyanyima, buumuke ku kiipacila kaa cyena mpenta, baalukile cyakabidi ku dyenza dya malongolodi ne bikwabo bintu. Nwamonu anyi?

<sup>136</sup> Citudi benze ncinyi? Bashipe mwena Ejipitu bu umwepele nanku. Neya bushuwa. Ke twètù kuteeta. Twètù kulubakana. Twètù kufuta. Twètù kuyooba, kuya mu masangisha a milombo a bufuku bujima, too ne mutwalu kushaala ne mèyì mapate. Nenku—nenku kuteeta bwa kukwatakaja cintu kampanda, ne kutuntumika cintu kampanda, ne mishindu yònsò ya bintu eyi, kadi balwe kusangana ne cidì anu dipangila dya menemene edi. Bidi bitukengela dyalukila mu cipeela. Cya bushuwa. Eyowa's, mukalenge. Dyaba ne didisuba. Mbwa cinyi kubenga anu kubilekela mwine? Ke civwa cikengela nwènù kwenza, nwamonu's, kwalukila cyanyima kadi kubilekela. Mona's, tudi benze cintu cimwecimwe cyakenzabo bòbò, cintu cimwecimwe

cyakenza Mòsà. Kabyena ne dikwacisha diine to. Paanyima paa bidimu makumi anaayi, kudisanganaye mwena buloko wa Dìyi dya Nzambi. Citudi tuteeta kwenza ncinyi?

<sup>137</sup> Piine apu, Dibenesha dinene dipatuka, ne dimweneshiibwa dya bintu binene ebi bivwa Nzambi mutwãmbilè: mutudi ne cya kulediibwa cyakabidi; ne mutudi ne cya kupeta Nyuma Mwîmpè; dibatiiza mu Dîna dya Yesu Kilisto; ne bintu byònsò ebi mwaba ewu.

<sup>138</sup> Nudi numona, bantu, pamutu paa kushaala balamate ku Dìyi adi, baswikiibwe ku Dyòdi, badi benza cinyi? Mbabange ne dilongesha dikwatakaja dyabo bòbò dya cyena mangumba, diine dikaadi dipangile adi, biikale bateeta kukwatakaja cintu kampanda bwa cyòci kufwanangana ne Bulelela.

<sup>139</sup> S'mbipiciibwe ne mêmè mwimanyikile anu mwine mwaba awu. Nwamonu anyi? Ndi mutwishiibwe ne nudi ne lungenyi lukumbane bwa kumanya cîndi muswe kwamba. Nwamonu anyi? Kadi, mona's, tangilaayi numone cidi bwalu ebu bwenze. Elanganaayi meeji pa bwalu abu.

<sup>140</sup> Citudi bapete ncinyi, diloolo edi, piikalaci kacyi ditunga dyûle tente ne bantu badyènzè bulongolodi biikale bavila Mifundu ya Nzambi; bafwanyine kubiikila kudi—kudi—kudi Mwoyi wa Nyuma Mwîmpè, ne: “Civwa ndubuku,” bafwanyine kubenga cya nanku awu bwa kubwelaci mu wabo ekeleeziya. Ne bòbò kî mbafwanyineku kukwitabila bwa wèwè kuteeja nansha Dìyi dimwepele pa bidi bitangila dimiinu dya nyoka, dikubiibwa dya Cyendelele, ne bintu bidi Nyuma Mwîmpè mubuulule ne mujaadike ne n'Dìyi to. Ndi mwelelele kadyombo pa kadyombo, bwa kulwa kundeeja ne mbya mafi.

<sup>141</sup> Cidibo bapete ncinyi? Cintu cimwecimwe civwa naaci Luther aci, ne bakwabo baabo, nwamonu's, bashipe mwena Ejipitu umwepele. Ncinyi cidi cikengela...Civwa ncinyi? Pàmwäpa wakafikisha muntu kampanda ku dibanga...ku dilekela bwîvi, anyi pàmwäpa ku diikala ne nsòmbelu wa lulamatu kudi mukajende. Kadi cyûkaadi mumuvwije ncinyi pa kuumusha ciine aci? Cidimba cya ekeleeziya. “Lwâ ushaale mwena cisumbu cyetu.” Nwamonu anyi?

<sup>142</sup> Muntu mufwe ukààvwa ununka awu ke cyende cintu cimwepele civwaye mwa kwikala ufunkwinangana minu, bu ne ke dyende dyakalenga dyakatuutaye, dya bidimu makumi anaayi bya dilongeshiibwa; mwena Ejipitu wa ununka mulaale mwaba awu, mubole ne mufwe.

<sup>143</sup> Cidi anu bu mushindu awu udibi diloolo edi. Cintu cimwepele citudi mwa kufunkwinangana, bwa ditabuluja edi dikaadi dishintulukeshintuluke edi (mudibo mwa kudibiikila), mmusumba wa bidimba bya ekeleeziya bidi binunka ebi bidi kabiyi bimanye Nzambi to anu mudi Hottentot mufwanyine kumanya mwanu wa beena Ejipitu wa mafuku cinunu ne bumwe.

Cya bushuwa. Bôbò biine abu, udi mufwanyine kubambila bwa Dîyi dya Nzambi, bamba ne: “Mêmè nciitu ngitabuuja Aci to.” Bamba ne: “Cyûdi wamba nansha ciikale cinyi, ncyêna nCiitabuuja to.” Nwamonu anyi? Nwamonu anyi? Aci’s nciitu cibyâcibyâlè cya kufunkwinangana ciwakenza, bwa dilubakana dyônsò ne didisuba ne byônsò bitudi naabi ebi.

144 Pàmwâpa tudi bafwanyine kufunkwinangana cilongelu cinene, kadi’s nciuwe. Tudi bafwanyine kufunkwinangana bulongolodi kampanda, kadi’s mbufwe. S’bukaadi bununka bibi. Budi anu mudi cintu cya kumpala citwakatapuluka naaci. “Anu mudi ngulube uya mu bitoci byende, ne mbwa uya ku bilushi byende,” patudi tukudimuka paanyima. Mwena Ejipitu umwepele mufwe.

145 Kakuyi mpatà to paakamba muntu ne: “Môsà, ee, kucyena kabidi uumvwa lutatu lwa cisamba anyi? Wêwè ewu’s uvwa mubiikidiibwe mbwa kwenza eci.” Muntu kampanda uvwa mumanye Môsà, ne mumanye ne civwabo bamubiikidile ncyôci aci. “Kadi kwêna . . . Ukaadi mujimije dyumvwa dya lutatu lwa cisamba anyi?”

“To, mukalenge.”

146 “Ee, bwa cinyi kwêna mupatuke, kwaka, munkaci mwa kwenza *cikampanda*? Ne bwa cinyi kwêna mupatuke pambelu apa, uteeta kwenza *cikansanga*? Ne bwa cinyi kwêna utungunuka ne bakwabo baabo?”

147 Môsà uvwa usanganyiibwa pambelu pàâpa uvuudiibwa, too ne paakapetaye dilabula dya kaacipuka kavwa kateema kapya, kaakamba Dîyi. “NDI Nzambi wa Abraham, Izaka, ne Yakobo. Ne Ngävùluku mulayi Wanyi. Nenku Ndi mutuuluke bwa kubasungila. Ndi nkutuma wêwè bwa kucyenza.” Civwa ncyôci aci.

148 Yèyè wakamona Dîyi, kî nkiipacila kaa cisamba anyi majinga a cisamba to. Pashiishe yèyè wakalwa cinyi? Kàcivwa kabidi muswe kukungamangana ne beena Ejipitu to. Kàcivwa kabidi muswe kukungamangana ne cintu eci to. Kadi wakalwa mwena buloko. Amen. Bidimu makumi anaayi bya dinyeemakana, bya divuudiibwa, kadi pashiishe kulwaye mwena buloko, ku kaacipuka kavwa kateema kapya, Môsà wa bukole ne mamanya ende ônsò a mu mutu awu. Bible mwikale wamba ne Môsà uvwa muntu wa bukole mu dyakula ne mu byenzedi, mu Ejipitu mwamwa.

149 Kadi tangilaayi numone cyakenza mumanyinyi wa maalu a Nzambi mu tulaasa awu mu Bwikadi bwa kaacipuka kavwa kateema kapya. Yèyè wakatonda anu dipanga kukumbana dyende. Paakamonaye kiipacila kalelela kaa Nzambi, wakatonda wamba ne kavwa mukumbane mwa kucyenza to. Kadi paabi, yèyè’s uvwa mulongeshiibwe mu maalu ônsò a Nzambi a mu tulaasa akapetabo mushindu wa kumupa awu,

mulongeshiibwe mu cilongelu cyabo cya citambe bwîmpè. Kadi, nansha nanku, civwaye mwa kwenza ncinyi pavwaye. . . Dikunji dya Kapya adi dilembelele mu kaacipuka aku? Yêyè kwamba ne: “Ncyèna nansha nkumbana mwa kwakula Nende to. Mukalenge, mêmè ndi nganyi, bwa kukengelabi anu bwa mêmè kuya?” Nwamonu anyi?

<sup>150</sup> “Kopola bisabaata byebe, Mòsà. Ndi muswe kwakula neebe. Anji divuula, nansha bisabaata byebe abi. Udi—udi mwalukile panshi cyakabidi. Ndi muswe kwakula neebe.”

<sup>151</sup> Kayi nansha ne mushindu wa kwakula to. Ndekeelu wa byònsò, mwena buloko musungula, muprofeta musungula, anu muvwa Pòlò mwikale musungula amu. Mòsà uvwa musungula, musungidi. Ke pashiishe, ndekeelu wa byònsò, Nzambi kuvwija muntu Wende musungula awu mwena buloko Wende. Kaa, aleluuyah! Yêyè uvwa mwa kutentemuka anu pavwa Dîyì dya Nzambi mwa kumutentemuna. “Nêngämbè ne Udi muntume nganyi?”

“NDI.”

“Nêngënzè munyi?”

“Nêngikalè neebe.”

<sup>152</sup> “Eyo, Mukalenge, anu mùdì Wèwè wamba amu. Ke mêmè ewu.” Kaa, ekelekele! Aci, mmwena buloko awu.

<sup>153</sup> Udi uya bibengangane ne ngeelelu wende wa meeji wa mutambe bwîmpè awu. Mpindyewu, yêyè ukaavwa mulongeshiibwe bwa kutumina cilwilu dîyì. “Myele ya mvita, muulu! Kudimukaayi!” Mulongeshiibwe bwa kuya: “Makalu a mvita, ònsò mu mulongo! Mafuma, atangiijaayi kumpala! Asaayi!” Awu ke mushindu udiye uya kakwatangana. Ke civwa dilongeshiibwa dyende ncyaci.

Kadi kwambaye ne: “Nênkwate mudimu ne cinyi?”

Yêyè ne: “Cyûdì naaci mu cyanza aci ncinyi?”

<sup>154</sup> “Dikombo.” Nzambi utu misangu mikwabo wenza maalu makutakane be, bwa meeji a buntu. Nwamonu anyi? Uvwa ne dikombo mu cyanza. Ne mwedi cipambà. Ne bidimu makumi mwandamukulu. Mukajende pa kampundu; mwànà musòmbè ku lubese. Tuboko tukese tukulakaji tufwatalale, tulembeleja panshi; ne dikombo. Anu kacya wela mutu muulu, bwalu uvwa ne EMU MMUDI MUKALENGE WAMBA. Bwa cinyi? Ndekeelu wa byònsò ukaavwa mwele ne lwongo.

<sup>155</sup> Uvwa mwena buloko. “Nëntentemukè anu pantentemuna Dîyì. Nêngàkulè anu mwaba wakula Dîyì.”

“Kûyaaya nkwèpi?”

<sup>156</sup> “Ndi ne mudimu umwepele muntuma naawu: kwimana kumpala kwa Pâlò ne kumuleeja, ne dikombo edi ne, Nzambi ngudi muntume.” Amen.

“Ciwenza ncinyi paanyima paa ciine aci?”

“Yêyè ngwâlôngolola cintu cyalonda, paanyima paa mêmè mumane kwenza eci.”

<sup>157</sup> Ke bwalu mbwabu. Udi wêwè ne cintu anu cimwepele cya dyenza, cidya cya kumpala, diloolo edi: kudilekelela, kulwa mwena buloko. Kwedi meeji bwebe wêwè mwine anyi bwa cintu cikwabo to. Shaala mwena buloko.

<sup>158</sup> Môsà kulwaye mwena buloko, kutondaye ne muvwaye kayi nansha mwa kwakula to. Ndekeelu wa byônsò, paakamupeta Nzambi mu cyanza Cyende, muvwaye mwa kutentemuka anu mwaba uvwa Nzambi mwa kumutentemuna amu. Mwaba awu, Yêyè kumwambila Dîyi. Kumanyaye ne civwa Dîyi, ke yêyè kudishiya mukookele ku Dîyi. Nenku Nyuma Mwîmpè mwaba awu, Nzambi, kuswikilaye Môsà ku diswa dya Nzambi.

<sup>159</sup> Ke cintu cimwecimwe aci cyakenzelaYe Pôlò. Neyu bushuwa anyi? [Disangisha didi dyamba ne: “Amen.”—Muf.] Wakaswika Pôlò; keena Yuda kakese, kaa dyûlù dikonyangale, keelulwidyanganyi, kaa, kiikale ne mapolome a Ph.D. ne LL.D. mamufunda pambidi pajima. Kadi Yêyè wakamba ne: “Mêmè nêmmuleejè dikenga dyakengaye bwa bwalu bwa Dîyi.” Nwamonu anyi? Ke yêyè. . .

<sup>160</sup> Nenku pashiishe Pôlò musômbe mwaba awu umona Dîyi, ne mwikale umona ne civwa n’Yesu, ke kwelaye byanza byende muulu ne kulwaye muswikiibwe kudiYe. Dinanga dya Nzambi ke dyakamuswikila ku Dîyi. “Yêyè ke watwala Dinà Dyanyi kumpala kwa baa Bisamba bya bende.” Ke yêyè uyaaya wawa.

<sup>161</sup> “Môsà, NDI Nzambi wa baataatù beebe. NDI Nzambi wa Abraham, Izaka, ne Yakobo. Ngävùluku ne Ngâkabâlâya, ne cikondo cya mulayi cikaadi pabwîpi. Ne Ndi mmona ntatu ya cisamba Cyanyi. Ngävùluku mulayi Wanyi. Nenku nyewu Ndi mutuuluke bwa kukuswika nkanu. Udi mumanye cidî Dîyi dyambe. Ngakuswiki nkanu bwa wêwè upweke uye kwôkò aku, mukuswike ne bukole, bwa upweke uye kwôkò aku bwa kusungila cisamba Cyanyi. Nenku angata dikombo didi mu cyanza cyebe adi, bu cijaadiki, bwalu wamonu cishima cidî dyôdî adi dyenze.” Anu bu Davidi menemene, ne ndundu wa nyuunyi. Nwamonu anyi?

<sup>162</sup> Muswikiibwe mu nkanu, yêyè mwine, ke kupweka kuyaye. Ndekeelu wa byônsò, Nzambi wakapeta muntu uvwa muMukookele, muswikiibwe kudiYe, ne uwaku kayi mwa kutentemuka to anu pavwa Dîyi dya Nzambi dimutentemuna. Bantu biikalapu mwa kwenza nanku, leelu wa Ndaaya ewu’s we! Pa dîbâ adi, ukaavwa mwena buloko Wende, mwena buloko wa dinanga, muswikila ku cikokedi mu mwonji wa dinanga, ne Nzambi, muvwa Pôlò muswikila ku cikokedi mu mwonji wa dinanga kudi Nzambi.

163 Anu muvwa Pòlò, bònso babidi bavwa balongeshiibwe mu mushindu wa mwomumwe. Mòsà mulongeshiibwe, nudi bamanye, bwa kusungila bânà baa Izaleela ku bukole bwa busalaayi. Pòlò mulongeshiibwe bwa kubapatula mu byanza bya beena Loomo ne kubavwija badishikamine, ku bukole bwende bunene bwa cyena ntendeleelu pa buloba mu dituku adi. Bilongelu binene mwakalongeshiibwaye, mukoleshila ku makàsà a Gamaliele.

164 Nenu bònso babidi baakaya mu cipeela; kumufumabo bantu bashiilangane. Bònso babidi baakamona Dikunji dya Kapyà. Ne bònso babidi bavwa baprofeta. Ncya bushuwa anyi? [Disangisha didi dyamba ne: “Amen.”—Muf.] Bònso babidi, baprofeta. Ne bònso babidi baakaakula naabo kudi Dikunji dya Kapyà, cya bushuwa menemene, dilwe bwa kukeba musungidi. Ke bóbò abu mwaba awu; kuyabo mu cipeela. Kushiya mbanza yabo e kuyabo mu cipeela, bwa kujandula. Kushiya baa kwabo ne bikwabo, bwa kupeta diswa dya Nzambi. Nwamonu anyi?

165 Bavwa balongeshiibwe mu mushindu kampanda; Nzambi wakabashintulula kubavwija mushindu mukwabo. Ne bivwa bikengela balwe bapika mu kaabujima, bwa kabayi mwa kwenza maalu mu mushindu uvwabo mwa kujinga kwenza to, kadi kwenza mu mushindu uvwa Nzambi ujinga bwa kwenzabo. Yèyè udi umweumwe awu makeelela, leelu, too ne kashidi.

166 Tudiku ne tusunsa tukwabo dikumi kuntwaku anyi, bwa kwamba ebi? [Mwaneetu Neville udi wamba ne: “Amen.”—Muf.]

167 Nènye lukasa lwa menemene bwa kufika ku muntu mukwabo. Ndi mmona umwepele kumpala kwanyi mpindyewu. Dìnà dyende n’Yozefu. Uvwa mwânà musungula. Uvwa cimfwanyi cipwangane cya Yesu Kilisto. Uvwa mulela muprofeta. Uvwa muprofeta, yèyè pende. Nwamonu anyi? Nenu mpindyewu yèyè uvwa mwa kumona bikeena-kumona. Nenu pacivwaye mwânà mutekete, kumonaye mu cikeena-kumona yèyè musòmbe pa nkwaswa wa butumbi, ne bânà baabo baa balume biikale bamwinamina. Nwamonu anyi? Kadi tangilaayi. Kulwaye. . . Kudyumvwaye bu ne uvwa muntu munene. Nwamonu anyi? Bóbò bònso. . .

168 Kadi civwa cikengela Nzambi kwenzaye ncinyi? Wakenza cintu cimwecimwe cyakenzelaYe bakwabo baabo aci. Bwalu, Mòsà uvwa musungidi, Pòlò uvwa musungidi, ne mpindyewu Yozefu uvwa musungidi. Wakasungila cisamba cyende ku ciyoole cya nzala.

169 Byakakengela ne Nzambi amwenzele cinyi? Kumwela mu buloko, kumwela buludi mu buloko. Eyowa’s, mukalenge. Vulukaayi ne, wakasumbishiibwa kudi bânà baabo, kudi mwena Ejipitu. Nenu baakamusumbisha kudi Potifa. Ke Potifa kumupa ndambu wa budishikaminyi, kadi, katanci

aka, baakamunyengabu. Nenku ke yêyè ukaadi musòmbe mu buloko wawa, udila, udila. Bivwa bikengela Nzambi amuvuule cyôci aci.

<sup>170</sup> Mpindyewu monaayi. Kadi, dîbà dyônsò, ngela meeji, yêyè, mu bwine buloko abu, uvwa mwa kuvuluka ne cikeena-kumona civwa cyambe ne yêyè neàsòmbè mu nkwaswa wa butumbi, ne bânà baabo nebamwinamine, bu muvwaye mumanye ne dipà dyende divwa difumine kudi Nzambi. Nenku uvwa mumanye ne civwa ne cya kukumbana.

<sup>171</sup> Twîkalapù nanshà mwa kulama aci mu meeji, ne bilondeshile Dîyi dya Nzambi, bwa ne mu matuku a ndekeelu aa Yêyè neikale ne Ekeleeziya, Neikale ne cisamba. Ne maalu akalayaYe aa, Neàenzè. Yêyè ngwákamba ne Neàenzè, nenku ke twètù bakaadi ne mwoyi mu ciine cikondo aci aba. Tukaadimu. Yêyè udi anu uteeta bwa kutufikisha ku diikala beena buloko baa menemene mpindyewu, bakangila Nende munda.

<sup>172</sup> Nutu bumvwe musambu wa kale unutu nwimbimba awu ne: “Ne pa dîbà adi ndi mukangila munda ne Nzambi”? Mêmè ndi muswe kwikala mukangila munda ne Nzambi. Mpindyewu, mwômò amu ke mûmvwà mwelele meeji pa cyôci eci. Mwikale mukangila munda ne Nzambi, kakuyi cîngà cintu nansha cimwe to, nenku utentemuka anu padi Nzambi wamba bwa kutentemuka. Wenza anu mudi Nzambi wamba bwa kwenza, nwamonu’s, pa dîbà adi udi mukangila munda ne Nzambi.

<sup>173</sup> Mpindyewu vulukaayi ne, yêyè uvwa wela meeji. Wakalwa kabidi mupangile anu bya menemene ebi, mu yêyè mwine. Byônsò bivwaye mumanye abi, byônsò bivwaye muumvwe abi, ne bikwabo byônsò, kulwaye mupangile anu bya menemene ebi. Kabiyiku mwa kukumbana to. Baakamubwinka mu bwalu kampanda buvwa muntu nansha umwe kayi mwa kumuteelejaku to. Kwikalaye mwena buloko. Nwamonu anyi? Baakamubwinka mu bwalu kampanda, buvwa beena bupidyà kabayi bafwanyine kwitabuujaku to. Nudi numona cîndi muswe kwamba anyi? [Disangisha didi dyamba ne: “Amen.”—Muf.] Mudimu wende wa bwambi wakashaala kawuyi ne bwenzeji nansha. Bantu bavwa batuma mutu ku luseke. Kabayiku mwa kutuma ntema yabo kudiye mu buloko amu to. Mudimu wende wa bwambi uvwa mufwanyine kwikala ne dikwacisha kaayi mwaba awu? Uvwa mwa kwikala wimanyina ku milonda ya buloko ayi kadi kubanga kubayiisha; bôbò bavwa mwa kutungunuka anu benda bapweka ne mùsèsù. Nwamonu anyi? Kadi wakalwa mwena buloko. Ke Nzambi kumulama, mwena buloko, too ne paakalwa lukata kubanga kwenda bîmpè. Wamba ne: “Muntu Wanyi nyêyè ewu!” Butumbi’s we! Mupangile anu bya menemene ebi!

<sup>174</sup> Ndekeelu wa byônsò, Nzambi kulwaye kudiye mu buloko muvwaye amu. Anu bu Pôlò, anu bu bakwabo baabo, kulwaYe

kudiye. Ke kukwataYe mudimu ne dipà divwaYe mumupe, bwa kumupatula muntwamu. Ncya bushuwa. Yèyè kuumumusha mu buloko muvwaye amu. Wakenza cinyi? Mmwenze anu Umupatula mu buloko muvwaye amu, kumupabo bukookeshi kudi mfumu, mfumu wende, mwena ku luseke kwàkasòmbàye, mwena mwinshi mwakateekiibwaye. Wakuumushiibwa mu nzubu wa buloko awu e kupeebwaye bukookeshi; mu mushindu wa ne, cyònsò civwaye yèyè wamba, civwa ne cya kwenzeka. Amen.

<sup>175</sup> Mu buloko muvwaye amu, uvwa anu wenza kuvuluka ne, wakalediibwa mu kiipacila kampanda. Uvwa ne cya kwikala musòmbè ku luseke lwa mfumu kampanda. Bakwabo bònsò abu bavwa ne cya kumutwila yèyè cinù. Ke muvwa cikeena-kumona cyende cimwambila. Amen. Kadi kumpala kwa cikeena-kumona cyende kuulaci patapata, bivwa bikengela kwanjiye kulwa mwena buloko. Amen. Nenku pashiishe kulwaye mukookeshi. Nenku paakapatukaye mu nzubu wa buloko uvwaye awu, ne paakashaalaye mwena buloko wa Dìyì dya Nzambi, bwa wamona mwa kwamba anu civwa Nzambi uteeka mukana mwende bwa kwambaye aci, pa dībà adi Nzambi wakakwata mudimu munda mwende.

<sup>176</sup> Monaayi, Mòsà awu uvwa ne bukole bwa kuswika bânà baa bukalinge baa Pâlò abu, ku diswa dyende yèyè. “Wèwè mwambile mukuna ewu ne: “Tentemuka.”” Uvwa ne bukole bwa kuswika bânà baa bukalinge baa Pâlò abu. Nansha biikale balami, anyi bakulu, anyi biikale baa—baaminyàmpalà baa ditunga anyi ne bavwa banganyi. Uvwa wamba ne: “Ndi nnuswika,” paabo kuswikiibwa. Ke muvwa bwalu nanku. Uvwa mwa kucyenza ku dīyī dyende yèyè, muvwabi bimusankisha amu. Amen. Butumbi kudi Nzambi’s we!

Kaa, ncidi ne tusunsa tukwabo bu tusatu nanku awu, bwa mêmè kushaala mukwate ku dīyī dyanyi.

<sup>177</sup> Mpindyewu tudi tujandula ne, yèyè—yèyè wakalwa mwena buloko wa Nzambi, muumuke ku bwena buloko bwa maalu a pa buloba. Kuumuka ku. . .Pòlò, bya mwomumwe. Ne Mòsà, bya mwomumwe, kuumuka ku bwena buloko bwa ngeelelu wende yèyè wa meeji, kuya ku bwena buloko bwa Nzambi. Nenku paakalwaye Pòlò. . .Ngeelelu wa meeji wa kale, wa Mòsà awu, wakamulekelela ne wakavuudiibwayi, kulwaye mwena buloko wa Dìyì dya Kilisto. Uvwa mwa kutentemuka anu kwònsò kuvwa. . .

“Udi wamba ne: ‘Kilisto?’”

<sup>178</sup> “Wakabala bundu bwa Kilisto bu mabanji matambe a mu Ejipitu bunene.” Nenku uvwa mwena buloko wa Kilisto, anu muvwa Pòlò amu.



179 Vulukaayi ne, bônso basatu bavwa baprofeta. Nwamonu anyi? Ne byakakengela kuvuudiibwabo ngeelelu wabo bôbô wa meeji awu, bwa kumonabo mwa kulwa mwena buloko wa diswa ne njila bya Nzambi.

180 Pashiishe tudi tuvuluka ne, mpindyewu, yêyê uvwa ne bukole bwa kuswika, ku dîyi dyende yêyê. Uvwa ne bukole bwa kusuulula, ku dîyi dyende yêyê. Uvwa mwa kwamba ne: “Ndi nkusuulula, mu dîna dya mfumu wanyi.” Amen. Pâlò wakavwija Yozefu mwanende wa balume.

181 Kilisto udi uvwija Bende beena buloko, baa dinanga abu, balwa bânà Bende. Ne Yêyê udi ubapa bukole, cintu cimwecimwe civwa Ye naaci aci. Yone Munsantu 14.12: “Ewu udi ungitabuuja Mêmè, nwamonu’s, byenzedi bîndi Mêmè ngenza yêyê neabyênzè pende. Neênzè nansha byàbûngi bipite ebi.” Mpindyewu mwena buloko wa dinanga dya Kilisto udi ulwa muvwadika bukole kudi Mfumu wende, Udi Kilisto. Amen. “Nenku bulelela Ndi nnwambila ne, wêwê mwambile mukuna ewu ne: ‘Tentemuka,’ kuyi wela mpatà mu mwoyi webe to, kadi mwikale witabuuja ne ciwãmbi aci necyenzeke, neupete cyûdi mwambe aci. Nwênù basòmbèle munda Mwanyi, ne Dîyi Dyanyi munda mwenu; wêwê muswikiibwe ku cikokedi Cyanyi,” bwalu Yêyê ne Dîyi Dyende badi cintu cimwe. “Ku cibangidilu kwakadi Dîyi, ne Dîyi dyakadi ne Nzambi. Dîyi dyakandamuka mubidi ne dyakasòmba munkaci mwetu. Umweumwe awu makeelela, leelu, too ne kashidi! Nwênù basòmbèle munda Mwanyi,” kî mmunda *emu* ne *mwamwa* to. “Basòmbèle munda Mwanyi, ne Dîyi Dyanyi munda mwenu; nulombe cinudi baswe, anyi nwãmbè cinudi baswe, nebânwênzèlèci.” Uvwa ne bukole.

182 Monaayi, kumpala kwa yêyê kupatuka, byakakengela kupatukabo nende ne kumukungula nsuki. Bivwa bikengela bwa ndambu wa bintu bikungudiibwe kumpala kwa kumonaye mwa kutuutaakeena ne mfumu wende. Nwamonu anyi?

183 Kaa, misangu mikwabo Nzambi utu wapatuka ne bantu Bende mushindu awu, ubakungula ndambu wa diswa dyabo bôbô, ubaleeja ne kabeenaku mwa kwenza civwabo bôbô mwa kujinga kwenza to. Nudi bamanye cîndi muswe kwamba aci. Kabeena—kabeena mu budishikaminyi bwa kwenzabo cidibo bôbô baswe kwenza to. Kumpala kwa kubwelabo mu bukole mu kaabujima ne kulwabo bapika baa dinanga dya Kilisto, bikengela babakungule ne pashiishe babaleeje ku bantu. Mîngà misangu Yêyê udi ubangata uya naabo mu cipeela, bwa kwenza cyôci aci, bwa kubakungula. Nenku pashiishe kubapatula, mulaaba maanyi, bwa kuuja kiipacila kadiYe mubalongolwele bwa kwikalabo. Nwamonu cîndi muswe kwamba aci anyi?

Bânà beetu, tukaadi ku cikondo cya nshiikidilu.

184 Vulukaayi ne, bikondo bikwabo byônsò, cituYe mwenze. Bitu misangu yônsò bimukengele anu bwa kwangata muntu

ne kumuvwija mwena buloko Wende, awu ushiya baa kwabo. Bivwa bikengela yêyê kushiya byônsò bikaavwaye mumanye abi, kupwa mwoyi mishindu ya malonga ende ônsò awu, byônsò abi, bwa kumanyaye diswa dya Nzambi, ne kulonda Nzambi.

<sup>185</sup> Yêyê kêna mwa kulonda nî ncinyi nî ncinyi cidi cikengela muntu kwenzaye, ne Nzambi, musangu umweumwe awu to. Mbibengangane bikole, eci ne eci. Kwêna mwa kwikala uya ku esete ne ku wesete musangu umweumwe awu to. Kwêna mwa kwikala uya ku dyabalume ne ku dyabakaji musangu umweumwe awu to. Kwêna mwa kwikala wenza bwalu bwîmpè ne bwalu bubu musangu umweumwe awu to. Kwêna mwa kwikala wenda ulonda muntu ne Nzambi musangu umweumwe awu to. To, mukalenge. Anyi udi ulonda Nzambi anyi udi ulonda muntu.

<sup>186</sup> Mpindyewu, pa dîbà adi, pawikala wenda ulonda Nzambi mwikale mushaale ukookela Nzambi, pa dîbà adi udi ulwa mwena buloko wa Nzambi, wa Dìyì adi, wa diswa adi. Nansha cidi nî ncinyi nî ncinyi cikwabo cyamba, wêwè udi ulwa mwena—mwena buloko wa Dyôdì adi.

<sup>187</sup> Teelejaayi. Tudi ku cikondo cya nshiikidilu. Nenu ndi njinga kwamba bwalu ebu ne kaneemu kâàbûngì ne dyangata dya ne mushinga, bu mudi tusunsa tubidi twa ndekeelu etu munkaci mwa kupita. Tangilaayi. Nzambi, ku dyanyi dimona, cyenzave ne cidive ne cya kwenza, ne cyenzave mu dituku dya ndekeelu edi, nkupeta cyamu cya mudimu cya kunowa naaci. Bikengela apete cyamu cya mudimu, bwa kushiipula mu cishiipwilu. Cidima yônsò ewu, pakaadiye uya bwa kwenza dinowa dyende, bikengela ikale ne cyamu cya mudimu cya kwenzaye naaci; cya bushuwa, bikengela ikale ne mwele mutwe anyi cintu kampanda, cyamu kampanda cya mudimu, bwa kushiipula ntete. Ne bya pa madimi paabi bikaadi bibobe.

<sup>188</sup> Nzambi, twängätäku mu cyanza Cyebe. Utuvwije basadidi baswika ku mwonji wa dinanga Dyebe. Ukwate neetu mudimu bu cyamu cya mudimu, bwa kufikisha buloba ebu bwa bubu, bwela mulawu butudi basômbêle leelu ewu ebu, ku dyumvwa ne Yesu Kilisto udi umweumwe awu makeelela, leelu, too ne kashidi.

<sup>189</sup> Bwanyi mêmè mwine, Nzambi, enzaku bwa ngikale mwena buloko. Piikala bânà beetu bônsò bambenge, piikala balunda baanyi bônsò bambenge, ndi muswe kwikala mwena buloko wa Yesu Kilisto ne wa Dìyì Dyende, bwa ngamona mwa kwikala muswikibwe ku Dìyì Dyende, kudi Nyuma Mwîmpè, bwa kumona Nyuma Mwîmpè uvwija Dìyì dya Nzambi dishindika kudi bintu bimwebimwe byakambaYe ne nebyenjiibwe abi. Ndi muswe kwikala mwena buloko wa Yesu Kilisto.

Tusambilaayi.

<sup>190</sup> Ndi ndikonka, diloolo edi, ne mitu yetu miinyika, kiipacila katutu naaku aku, kaa kwikala cintu kampanda cya cyanaana aku, anyi pàmwápa cintu kampanda citudi bafwanyine kudyelela meeji aci, kwikala cintu cya budisu, ndi ndikonka ne katwenaku bafwanyine mu mushindu kampanda kuciteeka ku luseke.

<sup>191</sup> Ndi ndikonka ní kudiku nsongaalume kampanda mwab'ewu, diloolo edi, ukenzakana, wamba ne: “Mémè ewu, pângààkolà, nêngikale cintu *kampanda*.” Ndi ndikonka ní udiku mwa kuumvwa diswa dya Nzambi dikwata mudimu mu nsòmbelu webe, wamba ne: “To, to. Uh-huh. Ndi—ndi. . . twipacila twanyi twájìminyì mpindyewu. Kacya anu kubangila matuku makese mashaale aa, Nyuma Mwîmpè mmwakule naanyi. Ndi—ndi—ndi—ndi muswe kudilekelela kudi Nzambi, bwa kwikala cyamu cya mudimu cya kushiipula naaci bwa dituku dya ndekeelu edi.”

<sup>192</sup> Nsongaakaji kampanda mufwanyine kwikala ne twipacila twa ngikadilu wa inábànzà wa maalu mîmpè, anyi—anyi pàmwápa twa kwikala kaamandemwanzele kaa kwîsù kulenga, anyi pàmwápa twa kwenza kumpala kutuyaaya eku ne Hollywood ikale kwende kukaadiye udiila, ndi—ndi ndikonka ne kwênàku mwa kuswa mpindyewu kwenza bwa ne kiipacila kiine keebe aku kakookele mu Bwikadi bwa Nzambi ne Dîyì Dyende, kuumvwaku dibiikila dya Nzambi mu nsòmbelu webe wêwè. Nzambi ngudi mumanye ne wêwè udi nganyi.

<sup>193</sup> Ndi ndikonka ne nkufwanyineku kwikala mwambi pabwîpi apa, anyi musadidi, mwena mudimu wa mu ekeleeziya mwaba kampanda. Mémè ntu mbwela mwab'ewu paanyi naka, ku musangu ne ku musangu. Ncyèna—ncyèna mumanye cyabisatu cimwe cya bantu badi basòmbè mwab'ewu aba to, diloolo edi, kadi ndi. . . dyanza dikese dya bantu batu mwab'ewu aba. Ndi ndikonka ne nkufwanyineku kwikala muntu wa mushindu awu, mufwanyine kwikala ne diswa dya kwamba ne: “Ncyèna bwalu ne cidi ní nganyi ní nganyi wamba nansha. Ndi mupika wa Nzambi mpindyewu. Mémè—mémè—mémè nényiishè Dîyì Dyende, nciyi mbitangilaku to. Nansha byôbì ne, bulongolodi bwanyi budi bungipata, mémè nènshaalè anu ne Dîyì adi. Ke cîngènzà. Diswa dyanyi ndiswa dya Nzambi. Diswa dya Nzambi ke dyanyi diswa. Nêngikalè mwena buloko wa Yesu Kilisto. Ku ngàsà ne dikwacisha Dyende, nèncyènzè.”

<sup>194</sup> Elangana meeji pa bwalu abu, patudi ne mitu yetu miinyika apa. Mbanganyi badi ne kiipacila aku, diloolo edi? Swaku wèlè cyanza muulu. Kaanyi paanyi kiipacila, nkôkò aku. Ndi ndekelela byònsò. Ne mitu yetu miinyika mpindyewu, biteketebitekete mpindyewu, paudi welangana meeji pa cyôci apu, patudi tusambila apa.

Ndi ndekelela byônsò,  
 Ndi ndekelela byônsò,  
 Byônsò kûdì Wêwè, Musungidi wanyi  
 mubeneshiibwe,  
 Ndi ndekelelela byônsò.  
 Ndi ndekelele- . . .

<sup>195</sup> Udi wambilamu cya bushuwa anyi? “Ndi muswe kwikala mwena buloko. Ndi . . . Ngangàtè, Mukalenge. Ngangàtè upweke naanyi kwa Mufwimbi, diloolo edi. Umpandulule tupese tupese mêmè yônsò, umfwimbulule, ku binù eku.”

Kûdì Wêwè, Musungidi wanyi mubeneshiibwe,  
 Ndi ndekelela byônsò.

<sup>196</sup> Taatù wa mu Dyulu, bu mudi musambu mutungunuke ne kwimba, mvwa ngela meeji ne bidi ne mushinga dîbà ditudi edi, bwa mêmè—mêmè kubwelela pa mwine musambu awu bwa ngakule Neebe katanci kakese. Bu mudi bantu munkaci mwa kwelangana meeji pa ne: “Ndi ndekelela byônsò,” Taatù, swaku bwa twênzè cyôci eci, byenze bu ne ewu ke wetu mpunga wa ndekelele wa kucyenza. Swaku bwa tulwe ne meeji matooke, tulwe ku meesa a Mukalenge, bu mwakadibi, ne bilâmbâ bisukula, misuuka misukula, diswa ne diswa bisukula, twipacila tusukula, bwa kudilekelela twêtù biine.

<sup>197</sup> Nenku Nzambi angate Diyî Dyende, mwikale utuswikakaja ku cikokedi cimwe naaDi, Diyî dya Nzambi adi. Nenku swaku bwa Nyuma Mwîmpè àtwängàtè mpindyewu, patudi tuumvwa cikokedi cituutakana ku nyungulukilu wa myoyi yetu ne: “Kubangila anu diloolo edi, Ndi nkukwata ku diyî dyebe. Mpindyewu kwikadi wela meeji ebe wêwè to. Wikale wela meeji Aanyi. Wikale wela meeji a diswa Dyanyi. Mêmè nênkulombòlè.” Nzambi, kumbajaku bwalu abu bwa kwikalabu dilabula kudi muntu ne mutu wa kutudi.

<sup>198</sup> Bansonga baa bitende badi basòmbe mwab’ewu aba; mulume ne mukajende; ne bakwabo badi bajinga kushaala mulume ne mukajende. Kudi bantu bakulumpe basòmbe mwab’ewu, biikale bambi, bakaadi mu mwine njila ewu. Nenku, Mukalenge, ke Mwaneetu Neville nyèyè ewu, mêmè, nyewu tukaadi tukafika kuulu kwa cibandilu. Matuku etu ngôwò aa akaadi mabala mpindyewu. Byetu bidya tukaadi tubyela ne mbàbì yàbûngì kupita mutuvwa tubyela. Tudi twanji kutangila bîmpè mwaba mwine utudi tudyata. Katucyena kabidi tudyata makàsà panshi ne ditwishiiibwa to, bwa ngakwilu wa mu mubidi ewu, bu mutuvwa kale wawa. Kadi, Mukalenge, patudi tumona mwoyi wa cifwaka awu wenda ubwucidila, nenku kakwena nansha dimwe dya ku makàsà etu didi mwa kutwibwa panshi ne ditwishiiibwa kuyi Wêwè mutukwate ku cyanza to.

<sup>199</sup> Mpindyewu, Nzambi, twängâtâku, Udiku muswe anyi? Angata myoyi yetu ne diswa dyetu mu cyanza Cyebe Wêwè

mwine, nenku utuvwije beena buloko, diloolo edi, baa Dìyì, baa Kilisto. Swaku bwa twikale ne nsòmbelu wa difwana dya Nzambi mwab'ewu. Swaku bwa bakaji aba, bansongaakaji aba, bansongaalume aba, bânà baa balume ne baa bakaji, balekelele nsòmbelu wabo, Mukalenge. Ne kiipacila kaabo kalwe kiipacila kaa kusadila Yesu Kilisto. Ne twètù tulwe mwena buloko wa ngàsà ne diswa bya Bunzambi Bwende. Enzaku nanku, Mukalenge.

<sup>200</sup> Ke cyònsò cîndì mumanye mwa kwenza aci, Mukalenge. Tuumèyi tukese tukosoloke etu, ne ndi—ndi ngeyemena ne Wèwè neututwangaje, mu mushindu udi ukumbana. Bwalu, mudi luuya lukole munda emu, ne bantu mbaswe kuteeleja, kadi luuya ndupite. Ne bikengela bààbûngì baalukile mu mààbò bwa kuyabo ku midimu kumpala kwa dîbà. Kadi swaku bwa mamiinu awu ashaale mu myoyi yabo ne, “mwena buloko.”

<sup>201</sup> Muntu alukile mwende akambile mukajende, padibo... kumpala kwa bôbò kudilongolola bwa kuyabo ku binù bwa kusambila, mu mapingaja emu, anyi mu diloolo emu, ku luseke lwa bulaalu, batangilangane ewu ne ewu, bamba ne: “Munanga wanyi, wamonu bishi bwa cyôci aci, diloolo edi? Tukaadi balwe cya bushuwa beena buloko baa Kilisto ne baa diswa Dyende anyi, anyi—anyi tudi tukwata mudimu ku diswa dyetu twètù?”

<sup>202</sup> Swaku bwa bansongaalume ne bansongaakaji, myaba yònsò, nangananga aba badi bateeleje Mukenji ewu, diloolo edi, bàdyèlè lukonko lumwelumwe alu ne: “Ndi ne diswa dya kulwa mwena buloko, mwikale ndekela nsòmbelu wanyi mèmè anyi?”

<sup>203</sup> “Ewu udi ulaminyina mwoyi wende neawujimije, kadi ewu wajimija mwoyi wende bwa bwalu Bwanyi neawupete.” Taatù, tudi bamanye ne, mbwena kwamba ne: kulwa mwena buloko Webe Wèwè, kujimija twipacila twetu twètù ne majinga etu twètù, bwa kupeta Ebe Wèwè, pa dîbà adi mpatudi ne Mwoyi wa Cyendelele. Enzaku nanku, Mukalenge.

<sup>204</sup> Cintu cimwepele cîndì mumanye, ncya kufila bwalu ebu mpindyewu mu cyanza Cyebe. Nenku swaku bwa bufile bipeta bîmpè byàbûngì ne bupatule byamu bya mudimu binene bwa dinowa dya ku dituku dya ndekeelu, balume ne bakaji, bânà baa balume ne baa bakaji, badilekelele mu kaabujima ku diswa dya Nzambi, biikale balwe beena buloko baa Yesu Kilisto, baa dinanga Dyende, beela byamu ne nkanu ku makàsà bya dinanga dya Nzambi kudi Kilisto. Tudi tulomba nunku mu Dinà Dyende.

Ndi ndekelela byònsò,


Tujuukilaayi kuulu.

Ndi ndekelela byònsò,

Byònsò kùdì Wèwè, wanyi...?...

<sup>205</sup> Twambululaayi cyôci aci, babwite kwisù ne byanza byela muulu.

Ndi ndekelela byônsò,  
 Ndi ndekelela byônsò,  
 Byônsò kùdì Wêwè, Musungidi wanyi  
 mubeneshiibwe,  
 Ndi ndekelela byônsò.

<sup>206</sup> Mpindyewu, bu twêtù mwa kwinyika mitu, ne kumpala kwa musambu wa ditangalajangana naawu kwimbiibwawu, wa ne *Angàtā Dīnā Dyā Yesū Wēndè Naadī*, nêndombè ne—ne mwaneetu wa balume udi apa ewu... Ndi mupwe dīnā dyende mwoyi. Mwaneetu wa bakaji wafidi bujaadiki bwa cikeena-kumona cya mīdimā miikale imupwekela awu, uvwa mwondopiibwe awu. Nenku vulukaayi ne, mmwenze anu utangila paanyima anyi, cibwikilu aci ciye. Diitabuuja dyende ndidi dyenze bwalu abu adi. Wêwè ututangalaje ne disambila, nnanku's, mwaneetu wa balume? Nenku ulombe mabeneshā a Nzambi pambidi peetu. 

*MWENA BÜLOKÒ* LUA63-0717

(A Prisoner)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu diisâtù diloolo, dya 17 ngondo wa mwandamutekete, 1963, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêyî ne dituuta ku cyamu mu kaabujima kaadi mu Anglais. Nkudimwinu wa mu Ciluba ewu mmutuuta ku cyamu ne mwabanya kudi Voice Of God Recordings.

CILUBA

©2017 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)